



張說之文集卷第十七

碑

贈涼州都督上柱國太原郡開國公郭公碑

奉勅撰

左羽林大將軍王氏唐文神道碑奉勅撰

撥川郡王碑奉勅撰

唐故高內侍碑

大周故宣威將軍楊君碑

元城府左毅贈郎將葛公碑

贈涼州都督上柱國太原郡開國公郭公

碑奉勅撰





四時平分清秋之氣勁五方異俗崆峒之人武故隴  
上多豪山西出將其有雲龍感召星象特生金鼓登  
壇隱如敵國麾幢指塞自比長城得之於太原公矣  
公諱知運字逢時其先太原著姓今則晉昌人也本  
乎文王之弟是為虢叔虢或云郭因而氏焉自燕昭  
尊隗以築宮漢祖封亭以列國其侯于陽曲宅彼太  
原舊矣亭之元孫友從太原徙隴西昭帝分隴西置  
西平郭氏又為郡之右族友之昆孫武威太守憲憲  
之猶子散騎常侍芝俱有名跡見於魏晉則晉昌諸  
宗散騎之後也爾乃一門連譽時人號曰三儒四海  
齊名天下謂之八顧光祿分於馮翊廷尉世茂於

穎川孝則天錫釜金忠則帝章冕服仁則猛獸不害  
信則童兒不欺豈直介休見有道之碑洛陽聞立德  
之傳而已曾祖欽瓜州大黃府統軍上柱國祖才朝  
議郎瓜州常樂縣令上柱國父師朝散大夫上柱國  
贈伊州刺史殞鹵之地戎馬生郊業戰鬪而宏勲仕  
州縣而為達啟莫京之繇福不在於其身積無聲之  
善慶必流於後嗣公太白之精雷泉之靈膺家之禎  
為國而生身長七尺力能扛鼎猿臂虎口虬鬚唐文作鬚  
鶚麟射穿七扎劔敵萬人之卿路逢遙識將軍之相  
唐舉一見足辨封侯之骨解褐以善戰授昭武校尉  
秦州三度府左果毅以敗敵北庭加遊擊將軍沙州



龍勒府折衝兼右金吾郎將瀚海軍副使尋改朝散大夫伊州長史伊吾副使以軍累破虜即授其州刺史進當軍經畧使朝廷以未愜前除且有後命遷本衛中郎將仍舊為州軍使默啜之寇北庭也公奔命解圍軍聲大震加雲麾將軍右武衛將軍封介休縣開國公食邑二千戶開元二年吐蕃入隴右掠坳牧公兵以奇勝寇不復蹤積甲山齊而有餘收馬谷量而未盡歸功廟算朝議多之拜右羽林將軍持節隴右諸州節度大使兼鄯州都督河源軍使鎮西陲信國之蕃屏坐北落亦王之爪牙故入奉期門而出分閩寄於是料敵無備間其師老潛軍一舉大俘九曲

鎖甲大劔焚馬犂牛既獻戎捷遂頒朝賜乃兼鴻臚卿攝御史中丞改封太原郡開國公加前食邑三千戶執憲總軍典屬乘障增爵益邑遇厚恩深俄而六州群胡相率大叛命公統隴右之騎濟河曲之師鋒鏑爭先玉石俱碎拜左武衛大將軍授一子官賜金銀器百事雜絲千段班師臨洮遘茲虐疾嗟乎匈奴未滅宿志不申生也有涯死而猶視開元九年十月二十二日薨于軍舍春秋五十有五蕃夷邊鎮血面椎心悲慘風雲號慟山谷豈非良將視人如子人亦視猶父乎皇帝閔焉詔贈涼州都督米粟五百石錦帛五百段命都水使者張景佚備物護葬遵朝典也



惟公氣猛而性和量寬而精銳沈謀可以掩著蔡雄  
斷可以奪鬼神故常糴糶鉞蒞狗風角然其樹恩  
結信立威用武烜赫如風濤震盪唐文震盪如雷雨  
戰必克功必取每有奏謁帝唐文特稱歎孝文之得  
魏尚虜不足憂太祖之見郭嘉知成吾事前後錫錦  
衣寶帶文馬素女爛其盈門長鳴在殿感知已之主  
陳必死之力皇情西顧則九羌疊唐文鼓詔書北伐  
則六狄焚旂上成聖君之元鑒下効武臣之素節其  
竟也如此夫為人子立廟致敬祖考來格不亦孝乎  
為人臣恢疆禦侮以勞定國不亦忠乎若然者歸義  
方於先人揚令名於後代可也嗣子英傑起復定遠

將軍左領軍衛翊府中郎將假紫服金章河西節度  
副大使英奇朝散大夫前尚輦奉御英協游擊將軍  
前京兆府唐文無兆勵行府右果毅都尉英彥朝議  
郎前左衛曹曹參軍等咸善居喪而過哀或從王事  
而奪禮則知幸賢父子繼位將軍祭形兄弟並參師  
律去本不戀達也而新是謀權也嘉此武功創其宅  
兆以十年七月葬於於字唐文太原夫人燉煌索氏  
祔焉禮也皇上念功以惜逝厚終以遇存有詔詞人  
為其碑志介士送葬即封征虜之墳單于入朝當祭  
度遼之墓銘曰

觥觥唐文將軍

雄畧冠群

平西征北

震戎疊唐文獠



亭障卧鼓 屯田饋軍 仗此白刃 致彼青雲

郭侯宴喜 既多受祉 元牡黻衣 清廟蠲祀

鼎食金奏 炮鼈膾鯉 既來不庭 有嚴天子

流沙博望 羽林飛騎 河曲迴兵 臨洮舊防

手握金節 魂沈玉帳 千里送喪 三軍悽愴

詔葬禮崇 恩碑義豐 生為神將 死為鬼雄

身世一滅 榮華萬空 祁連之墓 長旌武功

右羽林大將軍王氏唐文神道碑奉勅撰

維大唐開元十五年閏九月二十三日庚申右羽林

大將軍持節河西隴右兩道節度使營田九姓轉運

十闕大使兼赤水大使專知節度使攝御史中丞判

涼州都督上柱國晉昌伯薨于翠筵亭故也夫事君

効命之謂忠殺敵榮親之謂勇干星襲月之謂氣逐

日拔山之謂力有一於此名猶蓋世唐文矧兼其四

何人閒焉是晉昌所以錯落將星崢嶸山冢唐文者

也公諱君奐字威明瓜州常樂人也父壽因公建績

致位九卿臨難守死褒贈特進審塞翁之倚伏達蒙

眈之浮休老而益壯沒而立名者矣公威聲發於雷

泉武藝唐文標於峒嶺小頭銳上猿臂虬鬚龍劍摧

百勝之鋒虵予得萬人之敵拔自行陣果有呂蒙之

才拜於壇場不無唐文韓信之用始任鎮戍歷班外

府及郎將中郎至軍副率雖驟移官守而恒在疆場



郭知運推轂河源握符隴右公未登一命事主將之  
 旌麾不出十年代總戎之節鉞慷慨之士以為美談  
 於是自驍衛將軍遷羽林大將軍既督隴右兼統河  
 曲唐文綰塞垣之十軍佩節制之兩印大田多稼而  
 屯廩百億蒐乘籍馬而鐵騎數萬迺蹈赤山焚蜀幕  
 獵海唐文驅犖牛喑鳴則七戎辟易烜赫則千里震  
 動亭候恃其長城廟堂賴其神將月獻戎捷歲行軍  
 賞王侯無種屠狗起於將軍戰伐有功爛羊超於都  
 尉前後翻飛幕下奮躍行間跨軍典郡腰金冠玉者  
 數十百人矣每至入朝奏謁升殿論邊山川險易立  
 成於聚米攻守方畧一決於前籌遙詔置兵先合漢



光之旨新書從事暗同魏武之心故得延譽上騰風  
 雲鬱其氣色恩榮下沓日月供唐文其輝光當斯時  
 也躊躇攘袂三垂可以氣壓百蠻可以力制即敘者  
 老生之常談和親者豎儒之怯計安足為神武非常  
 之主道哉誓請先拔犬戎次擊唐文獯鬻盡區域於  
 西海關郡縣於北荒燁皇靈於天外圖壯節於雲閣  
 其事如果曠古未儔惟君知臣保斯言之可復何神  
 與善負厥志而無成是年秋八月吐蕃犯邊瓜州失  
 守盜憎吾唐文將執致其親公以為背父立威非孝  
 也頓兵從敵非忠也大義逼而忘家方寸亂而供國  
 其定計也成列而出討賊盡狄而退殺身忠在孝先



將之道也公馳駟要謀而迴紇內叛以八九之從人當數百之強虜然猶馘擊射殺傷畧半亭孤兵盡流矢橫及所謂仆而餘威折而不撓矣嗟乎嘗膽之憤空結噉肝之怨莫讎天子聞之黯然興嘆人言以命許國矣豈忘其言哉苟收必死之忠焉問不虞之過至矣蓋聖主推仁恕於天下懸大信於後人愛欲其生懲晉侯再克之喜惡傷其沒抱秦伯猶用之誠婉獨見之端豈常情所逮謀臣飲恩於望表猛將感德於事外然後任人之固衆可知也乃下詔追贈特進荊州大都督禮命寔宥加常二等死事之經也公之伉儷曰武威郡夫人夏氏韓母築城之智孟光舉

白之材拔棘解圍三軍懾其健婦崩城慟哭四海傷其孝妻此又間代之一奇一家之兩絕者也嗣子尚衣奉御承榮天獎賜蘭星祥名寶禮義形於橋梓哀戚過於纒麻稟訓惟堂克持門戶特奉恩旨收其二蔭飾柩玉關歸魂上國以十六年十月詔葬於萬年縣見子之原鹵簿齊列方相雙引京尹護喪史官頌石千乘送葬觀驃騎之威儀十里開塋識龍驤之邱墓銘曰

合衆在仁 正兵維義 將為天目 國命所寄  
 曲乃老師 輕實兒戲 安我封畧 才難不易  
 赴赴將軍 貌貅絕群 超騰白地 騫翥青雲



朝盛勇爵 家榮戰勳 衆聲飛譽 帝曰予聞

甲兵繕肅 屯積萬庾 馬量百谷 甘心犬戎

指掌撫鬻 大畢當趾 單于可掬 壯計先達

王師未張 城隍孤塞 寇及高堂 忠先孝後

取敵而亡 外仇易復 內變難防 克日將戰

呼天不假 岑彭詐客 張飛帳下 流鏑何人

交錢去馬 蒼黃唐文反覆 哀哉命也 美殮姑臧

寵歸芒唐文並陽 東都門外 南登路傍 高墳累累

列樹行行 父子同兆 何殊故鄉 詔刻金石

儀唐文作義形意氣 隱善必書 殤魂不諱 事棄忠在

生輕節貴 嗟爾明靈 銜恩求慰

撥川郡王碑奉 勅撰

珠玉無遠而登輦輅之飾寶也松栝無幽而入殿堂  
之構才也物貴其用人亦如之撥川王論弓仁者源  
出於疋未城吐蕃贊普之王族也曾祖贊祖尊父陵  
代相蕃國號為東贊戎言謂宰曰論因而氏焉公有  
由余之深識日碑之先見陋偏荒之韋毳慕上國之  
衣冠聖歷二年以所統吐渾七千帳歸于我是歲吐  
蕃大下公勒兵境上縱謀招之其吐渾以論家世恩  
又曰仁人東矣從之者七千人朝嘉大勳授左玉鈐  
衛將軍封酒泉郡開國公食邑二千戶周語曰夫戎  
樹敦守終純固今其俗獷而輕死其法折而不撓故



前代無降人中土無僮僕自公拔身向化首變華風澤潞之間始見戎州矣若夫河南胡苑坳牧所利每歲永合虜騎是虞中軍必謀於元老亞將固選於時傑神龍三年以為朔方軍前鋒遊奕使景龍二年換左唐右驍將軍開元五年兼歸德州都督使皆如故八年遷本衛大將軍改朔方節度副大使公之理兵也堅三草利五刃偶拳勇齊足力信賞罰分甘苦六轡如手千夫一心接獠獫猶蛟蚋卧沙塞如衽席薦居露食垂二十年雨畢而成師冰泮而休卒寒氣唐風入於肌骨夜霜出於鬚鬢人不堪其勤公不改其節韓公之建三城也公洗兵諾真之水刷馬草心之

山以為外斥而版徒安堵鄭卿之和默啜也公授館李陵之臺致饗光祿之塞以為內候而賓至如歸九姓之亂也單于也公四月度磧過白檀林收火拔部帳納多真種落彌川滿野懷惠忘亡漢唐文南諸軍漢避其計也降戶之叛河曲也公千騎奮擊萬虜奔走戡翦畧定師旅方旋而延陲跌跌復相嘯聚上軍敗於青剛嶺元師沒於赤柳澗公越自新堡奔命寇塲贏糧之徒不滿五百兇醜四合衆寡萬倍公殺牛為壘噉寇為餉決命再宿衝潰重圍連兵躡踵千里轉戰合薛訥於河外反知運於寇手朔方諸軍壯其戰矣斫摩之奔也邀於黑山口覆其精銳市思之背也



追至紅桃帳掩其輜重乳泊之會刺蘭池之狂胡大  
 糖杖盤之役縲方渠之逋寇凡前後大戰數十小戰  
 數百算無遺策兵有全勝是以六狄逃循三垂又寧  
 聲暴露於天下業光華於代載信皇威之所加亦武  
 臣之力也故錦衣寶玉允荅戎功甲第良田丕承錫  
 命語其智効未甚優寵黃頭黑齒比價齊名積戰多  
 瘡累勞生疹恩命尚藥馳往診之晉豎已深秦醫無  
 及十一年四月五日薨於位享年六十制贈為撥川  
 王稱故國志其本也太常議謚曰忠由舊典昭其行  
 也長子盧襲官封繼事業次子舊久特拜郎將十二  
 年四月詔葬於京城之南懷遠人也大路唐文大路

鼓吹介士龍旆虎帳貌裹封葬殉馬吉凶之儀舉夷  
 夏之物備長安令總徒以護事鴻臚卿序賓以觀禮  
 哀榮之道極矣君臣之義厚矣有命國史立碑表墓  
 吾嘗同寮敢昧遺烈銘曰

黃河接天 青海殊攘 舉世安俗 拔俗誰放  
 倬哉論侯 利有攸往 奮飛橫絕 搏空直上  
 以眾款塞 因敵立勳 吐蕃萬戶 吟嘯成群  
 精感天地 氣合風雲 既封酒泉 乃位將軍  
 朔方陰塞 直彼獯虜 帝命先鋒 闕如虓虎  
 山北加竈 漢南擊鼓 十數年間 耀國威武  
 我有師旅 將軍鞠之 我有邊氓 將軍育之



柳澗亡師 一劍復之 蘭池叛胡 三戰覆之  
 武節方壯 朝露不待 主爵送終 宿恩未改  
 時來世去 人物如在 銘勲蓋忠 以告四海

唐故高內侍碑

孝足動天義堪變地河中見三州之姓炳彼精誠南  
 亭聞再逢之母彰茲奇事不有陰唐文隱德曠代誰隣  
 內侍高延福者將軍力士之慈父也粵自西雲干呂  
 東明銜壁以亡王之族處巷伯之官而將軍本系馮  
 亭代家南越未知父母來奉宮闈老而無子曰悲幼  
 而失親曰苦調之悲者笙磬異器而同音貞之苦者  
 秦胡別狀而共色從此斷金合要投漆相受丞順無

違日嚴生乎本性仁慈匪飾天屬由乎自我父子之  
 名既定姓氏之目因移大將軍之家去鄭而取衛平  
 原侯之室變郭而從甄亦猶是也既而內侍以鴻漸  
 登朝苒弱朱紱將軍以龍樓得主豔耀金章其訓子  
 也溫室之樹無言車中之馬數對其事親也三牲有  
 養志之樂百行無匪疾之憂至矣哉高氏之子也以  
 思親之願而展親以欲報之誠而報德神明翕而哀  
 懇荒裔疎而慕義乃有傍求聖善提絜炎洲二紀積  
 離萬里遙至音容莫識涕對茫然驗七星於子心認  
 雙環於母臂而後深傷頓感若墜谷而登天蘊怨都  
 除類愈矇而覩日於是盡歡二媪兼敬三人均養之



恩威不寐於十起反哺之志齊色難於一堂羣公賀  
 虞潭之親天子歎馮勤之母此復然矣內侍事主四  
 朝歷官七政專良恭蕭著美綸言冲謙儉讓得名朝  
 列年六十有四開元十二唐年終於來庭里明年  
 某唐五月葬于長樂原繼子力士喪孺慕而加等葬  
 罄誠而備物義方之經鬱為稱首孝德之傳今見其  
 人永維先恩追綴餘烈若夫慈羈旅之稚童仁也約  
 詩禮之尊教義也貴不居而要避權禮也生推心而  
 死有託信也仁為德本義為行先禮為身宅信為意  
 田故仁之報也壽義之報也樂禮之報也安信之報  
 也順履順居安乘樂享壽此四者生人之偉事自求

之深致者矣於戲領賜冠馳寵勢偃蹇俗上煜爚君  
 傍者豈不思景行高山慎視前轍如或少選亡禮顛  
 沛違衣瞻言四報咫尺千里揚芳樹淑其不務乎予  
 固春秋之徒也懲不濫而勸不僭義重天網孝崇人  
 紀樂諄諄之成訓善哀哀之克子不著倚相之書將  
 受邱明之恥九原上千月深覽碑版傷知音有以見  
 古史之心也銘曰

高堂樂未散

重壤哀已擗

寶帳吹靈衣

金罇照塵席

苦長夜之易泯

怨寸景之難惜

刻義聲與孝心

萬古千齡傳此石

大周故宣威將軍楊君碑并序



公諱令一字令一太州仙掌人也隋司徒觀王之元孫周孝明高后之歸孫今司衛卿之元子維有隋接三統建萬國我高祖以同姓為王維皇周敦九族敘百官我諸揚以外戚而貴公體元黃之純粹承河山之丕緒孝乎內炳忠焉外均性與天和道合仁愛收恤孤老分產踈屬泰於周施約於妻子加以樂善而好學降尊而容衆能辨唐樂和思柔酒德容止可度温温如也文章可觀彬彬如也淵唐英皎穆當世碩士與之遊焉而曰君子若夫魏漢舊唐族有恩澤之封公卿門子有良家之侍公浮雲世祿匪石儒風究乎王道之紀綱明乎人事之終始年十九舉



進士高第授潞州參軍轉千牛曹曹迁洛陽尉從班次也居無何拜朝散大夫行通事舍人俄而加太中大夫檢校天官員外郎夫行人之在周禮方國是接公修其政令帝曰余嘉郎官之著漢儀列星是應公司其典故時稱邦則國家左賢右戚一武一文以公地望羽儀寄深虎旅除宣威將軍行右衛翊府郎將僂俛從事非其好也初公時為郎也遠戎悖虐作患幽冀皇上燠休下人故我有神兵之役選達權靡鹽之吏佐猛毅維城之師乃下制以公為兵曹焉實有密贊軍政獨飛長策豈云卒乘輯睦戎機式序若此而已哉俾雷霆颺動勦慝殿邦威元兔懷黃龍馬未



汗而狄盡人未疲而兵戢者公與有力也及班師振旅冊勲踰時帝用咨有司之違古念有功之未祿將迂德命需多勤有日矣方當翼大化增三光之明熙天秩垂九德之聲昊天不惠厲氣流行如何斯人胡不省壽年四十一聖歷元年夏六月辛丑遘疾而卒嗚呼哀哉梁木未施予道不完呱呱稚嗣仰號蒼穹哀哀嚴親惴臨淵谷遐邇察舊暨乎欽風未識之徒罔不盡朋悲而輩歎矣天子憫焉弔之以玉冊贈之以錦衾群公傷焉誄德於素旆圖休於青史粵乙卯假葬於合宮縣平樂鄉之北阜郭門十里印山西崗蠻萬古之阡都邑九原之地隧寄新隴懷故域藐是

諸孤未遑歸葬平生志事孰已焉哉厥弟五人比才連譽曰踐一獻一循一惟一尚一等因心則友世稱萬石之閨門死喪之戚吾見伯淮之兄弟僉曰我圖後事日月除乎哉乃布哀友生託唐詞懷舊跡德表墓宗之來昆其銘曰

洪河南注 少華西峙 氤氳靈會 生此君子

生此君子 維國之紀 宣慈惠和 禮樂文史

躬錫宗類 汲揚嫩否 勤然濟物 若不由已

克明從訓 誕敷厥美 修詞北闕 潤色東里

揮翰文昌 列星順晷 交戟禁衛 為王爪士

允武允文唐文作允文允武 翁歸是比 疇日禦寇 諗軍北鄙



攘狄黃龍 濟師蒼兕 將王元默 繫公是特

帝懿乃勲 將圖膺仕 仇仇執憲 不我力以

役役大勞 未受多祉 景命無祿 洪基中圯

父兮葆鬢 孤兮稚齒 孔懷靡及 凡伯萃止

陟彼卬山 邱墟歲磔 荒草無際 群哀所起

吁嗟揚侯 託居此矣 沕滴綿曼 德音唐文作美

久客思鄉 永懷桑梓

元城府左果毅贈郎將葛公碑

公諱威德字某曰葛氏京兆涇陽人也其先嬴姓咎  
繇之後夏有葛伯氏族興焉寧陵之傍尚傳侯國綏  
山之下獨有仙祠嬰則威服五城襲則績稱二縣鴻

臚秀於吳會散騎崇於晉景在其子孫是宜繁羨公

生而開朗長而英拔非因馬鄭之學動合禮經不待

孫吳之書暗同兵法有拳勇尚氣槩顧盼唐文稜華

風神都爽五馭善於東野六野勁於西霜少以嫖姚

之才入光供奉之選御橋驂駕犯清蹕而不驚輦道

啼鳥應鳴弓而自落便蕃左右星歲重深賜上柱國

拜元城府左果毅天下大定李廣之用無施雲中薦

賢馮唐之言已老春秋六十五神功二年某月終於

洛師藁殞卬阜夫人太原郡王氏夫人郭氏實生大

將軍福順一見聖主再紐乾綱重位冠乎北軍茂功

藏乎南史故象服臨祭魚軒以朝天子深嘉歎馮勤



之母群公列拜賀虞潭之親享年七十五薨於京兆  
 之三貞里公愛敬奉親軌則可移於後代義方訓子  
 福祿來及於先人葬有日矣乃下制曰禮著飾終情  
 惟悼往詢諸前烈抑有舊章前左羽軍大將軍葛福  
 順唐文下父某守其謙素宏此藝能未展才術奄從  
 凋殞而嗣子克家式昭勲業既念功以追遠亦自葉  
 而流根宜申獎贈游擊將軍守右驍衛翊府郎將開  
 元九年二月九日葬我郎將君前夫人王氏後夫人  
 郭氏祔焉禮也章芾以襚輅旗在列廟食脩其牲牢  
 法葬陳其簫鼓孝慈之道著矣哀榮之禮畢矣尋彼  
 平生之事忽如絕光擊乎碑版之文永存遺烈銘曰

磴磴都尉	角立傑豎	袖銳玉劍	氣雄金鼓
六藝爰設	射馭為武	百行雖名	忠信為主
時不兼命	位不克才	善流慶荅	身謝榮來
太原棣棣	寔惟嘉偶	羽林桓桓	克大其後

張說之文集卷第十七



張說之文集卷第十八

碑

唐故廣州都督甄公碑

唐故豫州刺史魏君碑

唐西臺舍人贈泗州刺史徐府君碑

大唐中散大夫行淄州司馬鄭府君神道碑

唐故贈齊州司馬陸公神道碑

唐故廣州都督甄公碑

君諱亶字道一中山無極人昔胡公紹舜奄有大邦  
楚子縣陳逃威樂土當烈王之王也有陳通奔周王  
以為忠將美其族言舜居陶甄之職命為甄氏錫姓



因生如堅之讀形聲轉注以真為音處則稱劉明歸  
 晉者以異變而為郭蓋承號者有馮通之裔即仕漢  
 為太保大司馬承陽侯即十六代而生鸞仕齊為太  
 山太守司隸校尉無極縣伯撰笑道論行於代鸞生  
 隋汾州刺史族族生隋沁州刺史紹紹生隋市令協  
 協生單于大都護府錄事參軍贈宋州刺史封惟祖  
 惟曾在商在夏世濟其美永觀厥成君即宋州府君  
 之第四子也博綜經史脫畧流俗情之所遺對咫尺  
 於千里氣之所重輕百金於一諾日興曰比階應劉  
 之間粵或草或真藏鍾張之筋骨譽滿鄉曲聲聞闕  
 庭天后臨朝再加辟命皆辭以親老不赴逮疾草易

簣骨立廬墳唐文復有制徵焉刺史獨孤莊率府僚

郭喻起於墳左乃授左金吾中候生盡其養豈違親  
 許人沒盡其哀方委身徇國或用或捨有以見大君  
 之仁時止時行有以觀大孝之節君臣之際其遠矣  
 哉尋除左千牛長史檢校武始軍長史攝右臺侍御  
 史兼靈武道行軍長史攝右屯衛郎將副臨洮軍使  
 轉右驍衛右郎將為臨洮大使拜蘭州刺史兼榆林  
 臨洮等軍大使除夏州都督兼鹽州防禦使徵授幽  
 州都督衣之以紫攝御史中丞為河北軍州節度大  
 使君政成周月惠則在人患是緩風表以去職未幾  
 復除夏州都督屬山戎矯虔倣擾王畧兵落天上思



迴唐文行以出奇虜墮計中守便宜而未進時以為  
 逗遛貶撫州刺史朝廷明此舉也未到官遷廣州都  
 督兼嶺南按察五府經畧討擊使春秋五十有七開  
 元五年七月二十八日終於官舍以某年月日歸葬  
 於恒陽之王八山南原不忘本也君三承辟命再攝  
 憲曹公典戎旅五司藩翰事之去就所歸必執其中  
 職之高卑為政各當其選觀夫果於事喻於義下學  
 而上達強立而知類畏尅厥愛道無常師有商也之  
 文有求也之藝習禮必本飾之以精華積行必崇茂  
 之以枝葉以此探賾則投刃皆虛矣以此効官則操  
 刀必割矣是故群士之所執掌而君之所綽約常情

之所戚戚而君之所蕩蕩由是言之槍榆之與海運  
 鳴琴之與星入從可知也惜其志懷慷慨雅多大畧  
 援桴作氣有七縱之能孤劍無前當萬人之敵竟不  
 得橫絕漠騁雄算刮狼望之楯鏡乎太清卷瀚海之  
 波靜而可掃駸駸之足受羈騏驥之途堂堂之良不  
 畫麒麟之閣彼哉彼哉有遺恨矣其孤某等望兮不  
 至求兮不得永懷揚名庶慰罔極銘曰

有鰥在下 洵復河濱 元女作合 相攸于陳

楚為不道 祚以永淪 周寵忠節 氏以初因

不惟承陽 致君論道 施及無極 逮唐家載考

彼汾彼沁 伊時之寶 宰兮牧兮 亦孔之好



積慶潛演 後人挺生 標格磊落 氣志清明

八司戎事 厥謀有成 五刺方伯 厥政有聲

山有杞梓 工思其度 國有孫吳 君思其畧

棄德珠浦 遺氛沙漠 惜哉不當 今也可作

恒岳臨北 滹沱注東 仁不忘本 孝亦令終

壽堂盤薄 牧子克窮 勒美松隧 穆如清風

唐故豫州刺史魏君碑時為荊州長史作

公諱叔瑜字思瑾曰魏氏鉅鹿曲陽人也考太師鄭

文貞公致君皇極配神清廟故祖德胄系敘於太宗

之先碑矣公生育慶緒天然炳胎教之姿少長德門

日用成躬率之化性盤於孝友習狃於禮樂俯仰中

則從容道蹈加以專精好古旁通多藝聖人之所志

聞一而反三君子之所能舉十而知九與同生璘琬

知名當代始以門資補左千牛轉洛州司兵司議郎

職方郎中太子洗馬出為懷州長史歷慶慈儀豫四

州刺史春華韡於兩宮時雨零於四郡觀風之使所

在聲聞變雅之老則唐致今遺跡唐諫其年春秋五

十有一終於豫州葬於舊城唐城夫人太原王氏祔

焉禮也議者以唐文公不避強禦有昭子之政事不

為皎厲有康子之隱德虛以尚賢有文侯之樂善重

諾分急有信陵之高義人鮮有一况兼四乎公賦入

封君妹歸帝子車馬無戚里之盛衣服有儒者之節



儉而得禮富而無驕此蓋奉先之素履也公善於草  
 隸妙絕時人以筆意傳次子華及甥河東薛稷世稱  
 前有虞褚後有薛魏此又貽訓之餘美也嗟夫公學  
 將向歆操齊固變若天假三壽朝登六事則鄭之桓  
 武可尋漢之韋平一揆而年近知命位止方州落鵬  
 翼於半霄負天之力莫展頓龍媒於局路追風之勢  
 斯畢九原不作誰將與歸二子獻華追存唐文先德  
 俾予作頌以慰罔極銘曰

昂昂豫州毓粹含道欽若古訓思文烈考於穆烈考  
 維國之師公承丕構思皇續之發軔臺閣風流榮問  
 建麾千里澤竄四群位未克德命不遂才彼蒼孤善

謂之何哉子孫必復邱封永久穆如清風振芳厥後

唐西臺舍人贈泗州刺史徐府君碑

敘曰經天地揭日月文之義也掌邦籍出王命位之  
 崇也本乎言行君子之樞機成乎易簡賢人之德業  
 則徐公其人也昔公奮明哲之姿當高宗之盛天保  
 大定後又用彰而光耀天臺雲飛綸閣文敏以暢機  
 務稽古以析嫌疑禮樂政刑擇三代之令典典謨訓諾  
 有唐虞之遺風較然於庶績者可得而聞也其嘉猷  
 謹言沃心造膝滋液內潤精微外密混成於元象者  
 不可得而聞也公諱齊暉字將道姓徐氏東海郡人  
 也遠祖偃王基仁義於上代嚴考孝德濟宏美於近



世公始以宏文生通五經大義發跡曹王府參軍右  
 千牛曹潞王府文學崇文館學士兼侍皇太子講文  
 芳林門修書于時中朝碩老下國英雋皆忘年請交  
 不遠來謁望其路者若晨風之赴北林得其門者如  
 衆山之仰東岱公不樂趨競雅尚退謚深以椒房之  
 家聲名太甚求為外職出宰桃林未下車勅改沛王  
 掾終歲選擬司績員外郎司議郎並不就乞補雲陽  
 令到官累日詔除司除司城員外乃遷西臺舍人其  
 為政也如始示爾初公幼而殊異八歲工文太宗聞  
 之唐其聰明召試詞賦錫以佩刀金鞘稱曰神童及  
 中年高宗乃乃字唐文道憂唐文悉命皇子受業訂

謨帝來唐文許以國鈞故公備更潞沛豫諸王侍讀  
 上之在周郎也公嘗來誨詩焉夫然集虎觀之書承  
 龍樓之問二宗之代矯首辭林四王之門從容經席  
 非有海山之藝溫良之德儀形以孚柔嘉維則其孰  
 能發揮聖智啟迪天人者乎咸亨元年出為蘄州司  
 馬二年坐事徙於欽州夫君子大守道而小守位污  
 隆隨時屈伸以義亡唐文令尹而不愠失司寇而遂  
 行蕙蘭敗不為不芳日月蝕不為不明姑務忠信何  
 陋蠻越優游欽江歲餘而沒春秋四十有三惜乎不  
 登宰衡以平天下天天是瘵命也歟既而慶隆嗣子  
 返公孫之柩德施後王拜先師之爵上元三年某月



歸葬於少陵原中興神龍元年贈泗洲刺史褒賢追  
 遠念道尊師聖人之禮也議者以公考果州府君高  
 學才華香名省闈武帝賢妃姊也大帝婕妤妹也公  
 既高步掖垣子又踐修舊職同生標藻於鸞殿重世  
 含章於鳳池自班姬父兄文雄漢室左思女弟詞蔚  
 晉宮悠哉二族徐氏三矣才難不其然乎凡是好文  
 之君賞音之士公之逝也豈不慨然閱青簡而存凌  
 雲之氣操朱絃而想流水之屬哉厥子曰堅景龍中  
 加金章紫綬行禮部侍郎得以命卿之祿奉蠲潔之  
 祀無念烈考樹之家風迺刊石立頌將以識往行攄  
 無窮使本枝百世唐代不忘先人之不殞其名也其

詞曰

王言惟令中禁是司帝嘉文父曰汝宜之終溫且惠  
 習禮明詩長裾傳道大筆修辭鴻業潤色玄黻緝熙  
 昊天大戾君子明夷蒼梧啟手涅而不淄中興受命  
 逝者無追靈符泗水崇贈先師髣像精魂丕承聖期  
 教近子貴榮躋父慈學嗣三葉才俱一時春秋孝享  
 霜露深思後之視昔斯文在茲

大唐中散大夫行淄州司馬鄭府君神道

碑

五岳可陟惟德也為之崇高萬物皆化惟名也謂之  
 不朽若夫行欲蓋而德彰道無求而名常立聞其語



今見其德歎人公諱其榮陽人也華州刺史襄城公  
 偉之曾孫蒲陽大守大濟之孫荊州刺史乾獎之子  
 在昔周王勃序九族邦唐勳懿親於鄭維時鄭伯敬  
 敷五教賦善職於周其後蕃衍儒門光華士族威行  
 西域名震京師入則天子授經出則單于抗禮公揭  
 日月表山川體二氣之清淳約百代之層慶越在岐  
 嶷異於常童以既唐冠帶遊皆長者初以門  
 子宿衛解褐涼州參軍轉嘉州司士又宰鍾離當陽  
 二縣皆秩滿兼攝江陵期月政不改俗官不易方群  
 盜出奔遠人來附其所處也入境聞愷悌之聲其所  
 去也扶路有鬱陶之思非夫忠信以結之法令以齊

之易簡以業之仁義以肥之孰能順人如此其理者  
 乎神皇玉冊受天金壇拜洛頓網唐而鶴書下闕  
 門而群龍至公待制唐公車召議室宣日以奇士  
 承一顧之恩許其正人參四率之屬乃墨制除太子  
 右清道長史尋加中散大夫行淄州司馬負士元之  
 才於是拜職遇邱明之疾從茲掛冠洛汭閑居漳濱  
 沈痼優游卒歲福應愆期豈惟唐朋友之哭將見  
 神仙之吊享年七十有九神龍二年夏六月十五日  
 終於洛陽之私第冬十月一日歸葬於榮陽之原成  
 先志也公執親之喪三年泣血以聞州里不亦孝乎  
 先人餘業一物不有以讓兄弟亦不悌乎加以唐賑



振窮紓急隱德陰施惠人由已反身待物是用氣類  
 益親聲談載路善擊劔好投壺盡五射之妙巧究六  
 書之體勢此蓋行有餘力則以多能位不充量天之  
 命也有子曰博古曰博雅曰嘉徵曰嘉慶曰重生極  
 其養沒過乎戚恭惟皇考安宅靈邱威德備於卑位  
 家風缺乎糖國史伐石他山寄哀詞客子產遺愛  
 得無叔譽之言公業不忘實有荀攸之歎式撰鴻烈  
 垂之後昆銘曰

大君有命 桓公封鄭 世執王政 其後不競  
 為韓所并 以國成姓 汎水截河 溢為滎波  
 荆山之阿 勝氣實多 高門峩峩 袞服委佗

猗嗟君子 世濟其美 動如義市 居成仁里  
 鳳集文史 猿啼弧矢 善唐文政當官 惟人所安  
 救危拯越 勞而不伐 大運奄忽 芳留形沒  
 高隴既封 深泉又重 徑無人蹤 蒼苔歲濃  
 哀哀邱壠 隋淚青松

唐故贈齊州司馬陸公神道碑

公諱孝斌字順姓陸河南洛陽人也其先帝媯啟姓  
 陳胡立族敬仲之孫有齊國宣王之弟封陸鄉蓋命  
 氏之所由興也秦并諸國陸氏分適燕魏文燕者魏  
 文成帝時東平成王侯生平原簡王麗重世游美為  
 國之華公即簡王七世孫也曾祖彥昇北齊以文藝



高選任祕書郎以至德表唐文下居號終孝里祖元

亮隋鷹揚郎將父淳感盤桓利身弓招莫進同誌誅

行謚為惠康孝悌仁義世不殞矣公誕靈冲和稟識

高明唐賦簡而中禮易而達節篤學勵行著實飛聲

文史者宗其淵府德行者仰其墻仞舉國子明經選

絳州參軍始州司法其在官也示人親其親長其長

不苛察而小無廢不皎異而大有成常曰常曰唐文

明常愴如也喪親過哀因中風廢卧疾累年不起楚

即輦封大羅雲逸雖沈疴未弭而僉望先唐文歸授

楚王府兵曹參軍實有躬降師賓之禮目擊儀刑之

之訓府罷換趙州錄事參軍以病去職聖歷元年旬

奴入趙公危邦不處盡室以行望河南而將濟至黎

陽而疾甚年六十有二十月丁未終於姚村之逆旅

歸殯於滏陽之郭北先天二年皇帝踐祚以故吏贈

齊州司馬惜哉用公之道行公之志上可以序三光

下可以平九士存則位不充其德歿則榮不逮其身

命矣夫夫人范陽郡太君盧氏故岐山丞元理唐文

之女恭儉之德備貞信之教興妻道母儀自家刑國

享年七十有六開元六年十一月丁未終於洛陽之

宣教里八年五月丙子合葬於漳北之坤崗禮也初

咸亨中王師征遼公參是軍事友人太原王守義遇

疫於海東路艱寇阻兵危勢急公獨顛沛致喪歸其



井邑其在安州也朝廷以公精達法理乃命覆囚劔  
 南梁歧寬繫動盈千百丹筆所詳十全八九其捨生  
 徇義返已施仁皆此類也禮莫重乎飾終於是見其  
 不朽矣善莫大乎餘慶於知其有後矣四子伯玉仲  
 容叔獻季良泣血銜恤視天若墜俾予作頌式昭遺  
 懿銘曰

曠哉陸公	觀奧臻妙	文雅外炳	清明內照
從政本仁	資忠移孝	不言而理	正身作教
才何富之	命何負之	居喪柴毀	遭疾棲遲
垂彼雲翼	落此盛時	歿後榮進	終延贈寵
德之休明	位匪為重	嗟嗟千載	賢士之隴

張說之文集卷第十八



張說之文集卷第十九  
碑銘

唐故瀛州河間縣丞崔君神道碑

故洛陽尉贈朝散大夫馬府君碑

貞節君碣唐文碑

唐故處士河南元公碣銘

平偃師碑尾

唐陳州龍興寺碑

唐玉泉寺大通禪師碑銘

元識閣黎廬墓碑

唐故瀛州河間縣丞崔君神道碑



蛟龍蟠乎沼無雷雨而不翔君子志于道無運命而不彰然則變化者是神靈之末富貴者非德行之本守其真樂其分不其至矣世有人矣君諱漪字某博陵安平人在唐為姜姓炎帝之孫也在周為崔氏齊侯之侑也遙源長發洪河之水接于天層盤列秀太行之山拒于海東觀所以美其文宗北州所以貴其清族魏冀州刺史簡公諱纂君之高祖也齊散騎常侍諱缺君之祖也隋太理少卿諱世立君之大父也故祁陽令諱抗君之皇考也承百代之隆慶總五德之清淳孝友忠肅宣慈恭儉好古博雅隣幾亞聖盈而若虛漠而無象非夫人周公之廟升孔子之堂則

憲章禮樂鮮得其門而覩矣弱冠以門胄入國學舉

進士母弟汲亦

唐文無亦

以明經同年擢第大理卿張公

文瓘人倫之表也目君曰昔兩劉並舉以為騁二龍焉今兩崔齊飛可謂儀雙鳳矣播紳景慕憧憧往來徙宅就居投刺成市若衆流之赴壑也及親而仕盤桓利貞解褐澤州晉城尉降為光州安樂尉換蘄州黃梅尉轉河間丞凡更三尉佐四邑體公綽之不欲勵伯夷之高操臨事以簡御人以寬雖為小政必有可觀故八使巡風再薦清白河上遺老江濱舊吏吟詠餘聲祖述前事人到于今稱之若夫碧樹煙藹於江潭紅荷藻耀於澤畔寶貝烟光於空浦美玉明潤



於斷岸不為珍輿瑤輦之飾前殿後池之玩誠自得  
 焉必將有賞心之所歎也况乎殿邦光國之寶罇俎  
 柱石之器道為帝王師言為天下利已而稅遠駕於  
 窮轍頓高才於下位亦無惜然固將有知音之所歎  
 也垂拱元年奉使上都遘疾終於時邕里之旅館享  
 年六十有二夫人河東裴氏湖州治中懷儉之孫滁  
 州司馬昉之女也稟訓華室作合高門嗣徽先姑克  
 和娣婦德容之盛圖傳罕有喪親過毀薜華朝落儀  
 鳳中卒於鄭春秋二十有八長安三年春二月合葬  
 於金谷鄉印山之陽禮也北據高崗連隴南面大道  
 禁林上國唐渟唐州文原指掌仙門宰樹碑闕

相望元靈嘉之是安是宅嗣子曰唐文用景龍中爵

安平縣子職兵部侍郎夙遭閔凶不承誨謫慎終追

遠克家用譽聖主拔奇賞異絕等超倫三顧赤墀之

下一舉青雲之上祿廩所資吉蠲致美實先人宥十

世降祥之所及也永惟官不達者身不登乎明堂祈

夸者名不書乎史冊則豁光隱德緒俾後代將何述

焉夫銘景鍾稱茂伐彼大夫之事篆豐石揚令名此

孝子之志辭曰

維嶽建國厥生炎皇維師尚父諒彼武王古人言曰

必齊之姜齊之丁公後有崔子因邑命族世濟其美

黃鵠倚歌雕龍擅史倬哉嗣武含章挺生以蒙養正



用晦而明混之不濁人莫能名學以崇道文以慰志  
 垂其雲翼坦然卑位祿逮吾親榮非我任皇皇上帝  
 建官惟賢有人在下胡寧捨旃孰云輔德曾不永年  
 展矣邦媛宜其家室友如樂諧皎如月出重壤既兆  
 終天偕畢北陵墳邱松楸千金秋碑石樓祇令人愁  
 東都城郭通澗瀝浴飛橋連閣金管迭作人世之轉  
 然兮山川之宛然兮德音之緬然兮

故洛陽尉贈朝散大夫馬府君碑

君諱某字某扶風人也其先伯益贊禹中行御殷在  
 周曰羸在晉曰趙上卿以人歸政唐文下有將軍以  
 馬服為姓緝熙乎平通重合焜燿乎伏波中水我高

祖汾州刺史諱歸歡我大父鷹揚郎將諱士幹嚴考  
 護嘉令諱果濟美惟舊冥德于君君幼而瓌奇長有  
 規操樂道稽古升堂觀奧伯父匡武撫之曰亢宗保  
 家吾有望爾悉以先人家謀唐敕圖傳付之太學舉  
 明經補巴西尉內憂去職君四歲而孤重集于蓼因  
 心孺慕名教同傷歸次葭萌江溢毀道攀轎號慟濤  
 為之却蚤人哀之葺棧而濟釋服調襄陽尉主進魚  
 家絕蠱食州將魯王俾盤二白魚時其亡也遺之夫  
 人以辭君還拜受使復王曰非唯是夫又亦賢婦吾  
 嘗其一得其二善焉長史盧幼孫悅是獎也舉君清  
 幹有聞授清城尉未往且有後命為河西營田判官



物土穡人藁穀洋羨皇揆其懋考績登焉程務挺之  
 軍靈夏也咨君運籌乘遞入幕獲虜數百欲剽罄之  
 君諫曰王者之師將德是以討叛惟武攜遠在寬博  
 牛之畜不可破風未擒伏念何逞累囚乃止師歸策  
 勲上柱國改溫縣尉永淳阻飢廣提中外絕甘分少  
 約已周人既喪好逮室無嬖御夫人張氏詹事丞師  
 寂之女也敬事皇姑能佐君子娠有胎教宗如樂諧  
 前誌之美多所闕載絳郡夫人王氏則天聖后姑之  
 女子而夫人之母也嘗曰婦則女訓吾女有焉享年  
 不永元髮徂落先時君之伯姊歸宗夫人推居廨寢  
 事之而躬處下室及亡設几筵於正寢惟明靈以女

公之故憑巫通夢屢寢為辭舉家懇啟久而後定嘻  
 唐噉生則盡禮死而知讓殆其神不昧乎溫秩滿轉  
 洛陽尉當周之興也版都社澤郊廟粹紛嶽僕明堂  
 京轂回回日不暇給又勅君專總徒匠凡三百有餘  
 旬蘊勞成疾眊憂損壽永昌元年孟夏辛卯卒官春  
 秋五十有七帝用悼之贈朝散大夫旌淑紀庸禮也  
 龜玉在山泉為國寶以其靈與瑞君子居下位而上  
 達以其名與義夫是之寵有由也哉葭萌之威昭其  
 孝也揚侯息浪異類胥感襄陽之饋熾唐識其潔也  
 德形於家聲聞于外塞垣之讜植其仁也衆俘賴全  
 將不為暴重屋之役底其勤也沒而益榮朝不棄力



有一於此猶為令德况備舉乎豈惟其身將施其後厥子構據擇皆國之良也為有後之唐文闕字其在是乎徵構職太子僕景龍初宰長安唐文下字永惟考襲朱芾已佩蔥珩母氏早逝而榮不及乃讓賜階乞封先妣天子憐之制贈夫人清河縣太君人謂長安能報恩矣詩云欲報之德昊天罔極報恩唐文無報此一之謂也馬氏之墓世在扶風清河之喪也卜宅於洛陽北邙山唐文麓後君捐館因窆其所夫人穴於兆之甲大夫窆於域之庚今龍集戊申將返葬故國君執友禮部侍郎嚴善思諡之曰夫子之逝一終八辰精氣其存親壤石矣吾嘗相二土從新其愈乎

且不戀本達不合葬古神尚休無或變有夢先君者與其言叶於是祇率嘉話即安即安唐文成規堙雙墳溝四塹傍建祠宇前勒豐碑茫茫天地永懷長畢誰居後之人匪唯是四時蒸薦之事所以觀百代祖宗之烈其詞曰

昂昂大夫有邈其致洽聞膚敏賙窮錫類孝唐文衍實迴川清能改位佐邑惟五安人則四多稼穰邊昌言扈帥比義后稷勤官沒地歔歔天朝毳衣以禴我有令德追啟清河宜家族操主祭神和親戚光貴劔蓋金歌相從先後樂此山河

貞節君碣唐文碑



神功元年十月乙丑陽鴻卒於雩都縣友人沛國朱敬則清河孟乾祚范陽盧禹等哀鴻抱德沒地繼體未識考行定謚葬於舊城鴻字季翔平恩人也其先著族右北平郡大父真陽宰適茲樂土爰定我居維桑與梓既重世矣鴻倜儻奇傑瓌璋博達貫涉六籍百家之言唐鼓其要在霸王大畧奇正大旨君親大義忠孝大節而已章句之徒不之視也嘗陋漢史地理志周禮職方志時異虛記心不厭焉乃攀恆岱浮洞庭窺河源踐岷衡稽四海之風俗算九州之險易與趙國貫高圖獻其議遇火焚盪天下壯其志而痛其事養徒閭里不應賓辟儀鳳中河北大使薛公舉

鴻行厲貪鄙天子嘉唐鼓之用寘于吏乃尉汲曲阿主簿龍門雩都夫其屏居十年一方化德歷佐四邑諸侯觀政惜乎有大才無貴任命也初鴻游太學有書生山東李思言物故南館鴻傷其終遠家屬有喪無主乃躬唐駟駕柩車送歸東土及在曲阿敬業作難潤州籍鴻得人歷旬堅守城既陷而猶鬪力雖屈而蹈節寇義而脫之因偽加朝散大夫即署曲阿令鴻貞而不諛詭應求伸既入邑則焚服闔門而設拒矣故得殿邦奮旅一境賴存淮海底績勲荅効功卒不言賞賞亦不及君子以為急友成哀高義也臨危抗節秉禮也矯寇違禍明智也保邑匿勲近仁也義



以利物智以周身禮以和眾仁以安人道有五常鴻  
擅其四武有七德鴻秉其二大慮克就之謂貞好廉  
自克之謂節粵若夫子可謚為貞節也已於是紀名  
垂迹表墓勒石其詞曰

倬良士縱自天辨方物覈山川厥志大哉峻剛節殷  
義聲返旅櫬唐斁窮城厥德邁哉哀斯人命莫贖  
德不朽温如玉軌來世哉

唐故處士河南元公之碣銘其序子將作  
少西行冲撰

嗟我處士煥炳其文精微天象與道為隣類乎萬化  
于三十春在昔薄葬時服幅巾厥孤克孝永懷遷神  
君其心之無違返真乃建豐碣追揚芳塵王公門路

豈微朱輪天才海學于何窶貧心焉有主孰知我艱  
烈烈皇考求仁得仁哀哀王母斯恩斯勤李虔報養  
王褒感親退居更命喪禮終身忠為令德孝實至純  
一門二善千載不泯

平偃師碑尾

粵以長壽二年十月十七日改窆於衛縣苑樓之西  
北原夫令德所庥餘慶末也神龍紀歷皇運中興天  
子嚴祀清廟緬懷前哲乃下制曰朝義大夫守衛王  
府司馬上柱國平元睿文故偃師令某公門襲慶士  
林成則名教羽儀道德泉藪輔仁冥昧早謝昌辰積  
善洋溢垂休茂侑時光祀夏慶屬配天錫類之恩俾



單於卿士哀榮之典宜旌於泉路可贈蒲州長史君子謂成其子而植乎身義方也愛其臣而及其祖孝理也孝以行惠惠以察忠義以立慈慈以昭順君臣父子於是形焉

唐陳州龍興寺碑

觀夫廣大無相者虛空也四輪倚之而住精微無體者佛性也萬法因之以生聖人有以見三界成壞皆有為殼故剖之以戒觜聖人有以見六趣輪迴是無明網故決之以定力唐文爍寶光之慧炬而沛善利之慈舟返迷路率於中道唐文橫流登於彼岸以言乎真實之要總攝一乘以言乎天地之間曲成萬

物大矣哉道心包舉等太虛而無際法教流通彌曠劫而常在則有乘如來方便出應化門用大士因緣處帝王位俾庶類咸若謂之光宅天下令衆生修善名為莊嚴佛國龍興寺者皇帝即位之歲溥天之所置也唐祚中微周德更盛歷載十六姦臣擅命伯明氏有盜國之心一闡提有害聖之迹皇上操北斗起東朝排閭闔運扶搖張目而叱之殷乎若震雷發地歛虢翕響以克彼二凶赫然若太陽昇天晞熙仰象以復我萬邦返元后傳國之璽受光武啟唐文壇之王尊祖繼宗郊天祀地之禮既洎修舊布新政物班瑞之典又備乃考出世之法鼓大雄之事入無功用



之品住不思議之力一光所燭庶兆為之清涼一音  
所宣大千為之振動雲蒸風靡不崇朝而壞衣涌壘  
徧天下矣陳州者上古太皞之墟近代淮陽之地置  
守則列為郡封王則建為國本其風俗豪侈靡麗舊  
矣翻東門之下接袂成帷觴苑邱之上袷服成市信  
豫章唐州文之郊一都會也刺史南陽韓府君名琦其  
為邦也勝殘去殺聖主之得賢臣別駕彭城郡王名  
隆業其從政也能肅而恭高陽之有才子長史南陽  
張齊賢儒林之選也司馬河南雲盈公族之良也士  
曹從事八人錄事參軍于璆為稱首六屬官人二十  
五人苑邱縣令崔修已為稱首或以藝榮或以門進

高車一轍美利同人禮舉刑清於是乎在因邦甸積  
稔之蓄偶日月再旦之初欽若王言建立靈寺上畧  
其趾下務其終百工不勸而亟庶役不徵而會經始  
如雲成之不日夫其帶四郭五衢之陌踞重墉闐闐  
之端福地砥平長垣雲矗高門有閱大廈斯飛連廓  
曲閣交軒對雷木磨而不雕土塗而不飾壯無僭侈  
以約費為功儉無偏陋以靜居為寶法王宮殿近寶  
花之城菩薩伽藍住金燈之地亦猶是也上座處元  
寺主真度維那唐文守慎等戒珠如月獨潔麒麟之  
行法寶如山普聞獅子之吼克諧善眾底定神居甘  
露飽而盈滿唐文盈滿盈滿天香醉而圍繞于時陳項之



老衰衣而博帶皤皤然相造而誦曰久矣吾黨之惑也倥侗顛蒙情嗜橫放恚愛我僕唐文聰明不開日有忘其生生日無覺其滅滅一息之漏可勝言哉而今舉足至于道場申臂及于淨土晝則目禪誦之事夜則耳鍾梵之音何悞是生晚臻斯樂豈不思夫子之至仁乎側下人之昏墊適上聖之昭軌假有相之途詣無生之理灑冥澤於已滅蒂元根於未始百靈之所歸依萬宇之所欣喜非獨陳而已矣蓋神闢天聖開地世唐文之祖也纂帝寶基皇統孝之主也殄僞狂破魔孽唐文威無外也廣正典紹度門德無大也通幽洞明兼麗該精滂洋而行混獲厥成一收功而四

善舉一推心而群願立咨如是則龍興之化曷有量矣夫業可大而蕪沒焉不貽於後事可尊而包蘊焉不迷於世唐文臣子之罪也敢請圖之然言語之不到者心識心識之不到者真如二乘聞之而不見十地見之而未了而我云何能知能說竊比六時之鳥七寶之樹是出乎和雅音聲是讚乎微妙功德記其在處長者之金園銘其事因育王之石柱其詞曰聖皇在上於昭于天唐雖舊邦其命惟新龍興返政滅二暴臣少康非擬於舜為隣皇上蒸哉

其

於廓元教生人戶牖神化灑心小大稽首掌擎萬域



潛移仁壽三代之前蓋未曾有最上乘哉

其

泱泱陳服韓侯道之奕奕寶坊邦人造之天龍護持  
賢聖熙熙受福維祺帝心則怡至理興哉

唐玉泉寺大通禪師碑銘并序

譔夫總四大者成乎身矣立萬始者主乎心矣身是  
虛哉即身見空始同妙用心非實也觀心若幻乃等  
真如名數入焉妙本乘言說出焉真宗隱故如來有  
意傳要道力持至德萬劫而遙付法印一念而頓受  
佛身誰其宏之實大通禪師其人也禪師尊稱大通  
諱神秀本姓李陳留尉氏人也心洞九漏懸先覺身

身八尺秀眉大耳應王伯之象合聖賢之度少為諸  
生遊問江表老莊元旨書易大義三乘經論四分律  
儀說通訓誥音參吳晉爛乎如襲孔翠玲然如振金  
玉既而獨鑿潛發多聞旁施逮知天命之年自拔人  
間之世企聞蘄州有忍禪師禪門之法備也自菩提  
達磨天竺東來以法傳惠可惠可傳僧璨僧璨傳道  
信道信傳宏忍繼明重跡相承五光乃不遠遐阻翻  
飛謁詣虛受與沃心懸會高悟與真乘同徹盡指妄  
識湛見本心注寂滅境行無是處有師而成即燃燈  
佛所無依而說是空王法門服勤六年不捨晝夜大  
師歎曰東山之法盡在秀矣命之洗足引之並坐於



是涕辭而去退藏於密儀鳳中始隸玉泉名在僧錄  
 寺東七里地坦山雄目之曰此正楞伽孤峯度門蘭  
 若蔭松藉草吾將老焉雲從龍風從虎大道出賢人  
 觀歧陽之地就去唐教成都華陰之山學來如市未  
 云多也後進得以拂三有超四禪昇堂七十味道三  
 千不是過也爾其開法大畧則慧念以息想極力以  
 攝心其入也品均凡聖其到也行無前後趣定之前  
 萬緣盡閉發慧之後一切皆如特唐教奉楞伽遞唐  
 近作為心要過此以往來之或知久視年中禪師春秋  
 高矣詔請而來跌坐觀君肩輿上殿屈萬乘而稽首  
 灑九重而宴居傳聖道者不北面有盛德者無臣禮

遂推為兩京法主三帝國師仰佛日之再中慶優曇  
 之一現混處都邑婉其秘旨每帝王分座后妃臨席  
 鸞鷲四匝龍象三繞時熾炭待礦故對默而心降時  
 訟飢投味故告約而義領一雨溥霑於衆緣萬籟各  
 吹於本分非夫安住無畏應變無方者孰能焉爾乎  
 聖敬日崇朝恩代積當陽初唐和文會之所置寺曰度  
 門尉氏先人之宅置宇曰報恩軾問名鄉表德非擬  
 一局馱誼輦長懷虛壑累乞還山既聽中駐久矣哀  
 憊無他患苦報魄散神全形遺力謝神龍二年二月  
 二十八日夜中顧命趺坐泊如化滅禪師武德八年  
 乙酉受具於天宮至是年丙午復終於此寺蓋僧臘



八十矣生於隋末百有餘歲未嘗自言故人莫審其數也三界火心四部冰背椽崩梁壞雷動雨泣凡諸寶身生是金口故其喪也如執親焉詔使弔哀侯王歸睂三月二日冊謚大通展飾終之義禮也時厥五日假安闕塞緩及葬之期懷也宸駕臨決至午橋王公悲送至伊水羽儀陳設至山龕仲秋既望還詔乃下帝諾先許冥遂宿心太常卿鼓吹導引城門郎護監喪葬是日天子出龍門泣金櫬登高停蹕目盡迴輿自伊及江扶道哀候幡花百輦香雲千里維十月哉生魄明即舊居後岡安神起塏國錢嚴飾賜逾百萬巨鍾是先帝所鑄群經是後皇所賜金榜御題華

幡內造塏寺尊重遠稱標絕初禪師形解東洛相見南荆白霧積晦於禪山素蓮寄生於坐樹則雙林變色泗水逆流至人違代同符異感百日卒哭也在龍花寺設大會八千人度二七人二祥練縞也咸就西明道場如前會萬迴菩薩乞施後宮寶衣盈箱珍價敵國親舉寵費侑供巡香其廣福博因存沒如此日月逾邁榮落相推於戲法子永戀宗極痛慈舟之遽失恨涌塏之遲開石城之歎也不孤廬山之碑焉可祚唐文子竊比唐夫子貢之論夫子也生於天地不知天地之高厚飲於江海不知江海之廣深強名無迹以慰其心銘曰



額珠內隱	匪指莫効	心鏡外塵	匪磨莫照
海藏安靜	風識牽樂	不入度門	孰探法要
倬哉禪伯	獨立天下	功收密詣	解却名假
詣無所得	解亦都捨	月影空如	現於悟者
無量善衆	為父為師	露清熱惱	光射昏疑
莫將住世	萬壽無期	奈何過隙	一朝去之
嗟我門人	憂心斷續	進憶瞻仰	退思付囑
盡不離定	空非滅覺	念茲在茲	敢告無學

元識閣梨廬墓

夫孝者法象乎天地感通乎鬼神故愛敬之中又有真報哀戚之外更追冥福元識禪師其人也厥姓桑

氏其先長樂人漢尚書洪之後唐文下曾祖梁州刺

史諱千秋祖貴鄉縣令諱信考文林郎名唐文爽自

前代無違德基於累仁是生達者禪師智周萬物而

理證本無願度四生而見滅諸有以為空不離色體

念子之慈業不亡緣起思親之孝乃於萬山北陌蒙

陽東原葬先考文林府君先妣太原王氏負土成墳

結廬其域置義井取施無求報鑄洪鍾取聞而悟道

脩古寺造尊容取觀相生信若夫信生攝攝生靜靜

生定定生慧於生滅處得常住心於虛空中立一切

法其定慧之門乎禪師昔宴坐介山群虎自擾今經

行宰樹四衆依德至人凝寂雖罕見全象識者餘論



亦時存一隅篆美豐石寄詞短偈云爾  
 邈矣上德行道密高哀哀父母生我劬勞禪心護念  
 神足遊遨苦唐文作河雖廣曾不容舫甘井既潔利  
 物無竭不增不減不流不滯仁靜而鑒智動而悅華  
 鍾既鏗雄雄法聲如來如去如滅如生不有奚得不  
 為胡成寶地嚴飾金山晃耀善惡無門惟人所召境  
 因心起理憑思照懿哉一心混成衆妙

張說之文集卷第十九

張說之文集卷第二十

碑銘

唐贈丹州刺史先府君碑

府君墓誌銘

唐故涼州長史元君石柱銘

唐故左庶子贈幽州都督元府君墓誌銘

周故通道館學士張府君墓誌銘

唐處士張府君墓誌銘

唐贈丹州刺史先府君碑

府君諱隲字成隲范陽方城人也張祖曰揮帝軒之  
 脣肇勳弦木錫姓上矣詩有卿士孝有史有留侯世



家八葉至東漢司空皓公子字北平太守始居范陽  
 四葉至西晉司空華公子躡散騎常侍乃僑江左昆  
 孫太常復歸河洛故河東有司空砦洛陽有散騎里  
 後司空至府君十二代不失仁義矣王父諱弋周通  
 道館學士考諱恪無祿早世府君莞生遺育四代單  
 緒家世尚儒不及伯魚之訓外祖為理遂讀臯陶之  
 書以明法厯饒陽長子二尉介休主簿洪洞丞以所  
 願乎上以所願乎上交乎下反身與人何往不順臺  
 選貞白覆囚山南人謂是行有典刑矣昊天不弔年  
 五十二調露元年十二月乙卯捐背於縣廨夫人長  
 樂縣太君馮氏父威藍田丞敬脩法度踐涉圖史顧

復幼孤將就成立家道不殞夫人是賴享年七十

唐文下有字二傾背於東都康俗里第光珪說不天夙遭閔

凶又集荼蓼先王制禮不敢從滅以景龍二年七月

已酉安厝于萬安山陽祔從周制也

唐文下有惟字先君不

祿俸不奉親不機杼不資身僚舊無雞黍之接况其

非唐文其非類乎族姻無魚菽之受况其人吏乎是

全其高而善其獨也過四十始閱六籍觀詩得之厚

觀書得之恒觀樂得之和觀禮得之別觀春秋得之

正觀易得之元曰君子多乎哉事斯一言而已矣每

誦道記三復三寶曰至人之心有以垂世又聞之太

夫人云吾有子五十載非其疾無一日之憂太



夫人亦云吾事夫子三十年耳無忤聲目無暴色先君之違世也其憂戀者尊門在殯歟聖善在堂歟我諸孤無日敢忘及王母終養二祖封崇亦尚克家成遺訓矣若夫安親孝也宜家義也翼子慈也軌迹隱乎含光故當代罕耀馨香發乎潛德故明神終勞先大夫久而益榮沒而不朽蓋此景雲二年天子嘉侍臣之匪躬念前人之蘊德二月乙巳詔曰故官某毓德高邁藏器下僚代載儒雅家傳清白河東佐邑長不欺之風山南覆囚溢無寬之聽徂謝永久邱墳不飾啟茲令胤貞事先朝宜崇追遠之恩以表揚名之志可贈使持節丹州刺史王澤漏乎泉壤國禮崇乎

宗廟漢帝論士恨不見李牧之為人曾子思親泣無逮楚王之厚祿道存運往痛矣餘悲緬尋前哲之所以聞無聲於四海視不見於百代者匪銘頌歟相麟蔡邕其則不遠嗚呼霜露交積松楸滋深兄弟永懷相顧將老胡伯虎豈敢掩大人之清陳季方何足知家君之德小子銜恤非曰能文莫假辭於他者務傳信我也銘曰

猗嚴考用元妙體太和竭高志貞夫一戒其多孝于親正于家刑于訓清厥心晦厥迹畏厥聞寶如何其謙儉孝慈皇哉衰德永世有詞

府君墓誌



府君諱隲字成隲姓張氏其先晉人也晉分家世相  
 韓韓滅留侯為漢謀主至宇為范陽太守因居其郡  
 及華博物亞聖為晉司空府君司空十二代孫也曾  
 祖諱俊河東從事大父諱弋字嵩之通道館學士考  
 諱恪未仕郎世先君四代早孤單門熒立宗祀之不  
 絕如綫府君襁褓哀麻鞠育舅氏而炳太和之純嘏  
 爍遠慶之洪胤庇身禮樂發言忠信小無不誠大無  
 不慎終日乾乾遠于晦愾靈根顛而還植祖德隆而  
 復振加以好學不倦聞一反三唐二道機元鍵罔不  
 幽探外王父大理丞某重世為士君府傳其憲章博  
 施精理年十九明法擢第解褐饒陽尉丁王母憂去

職夫人少而守義老而無子因心創巨事不忍言喪  
 紀之數加人一等服常唐調長子尉換介休主簿  
 洪洞丞太夫人在堂官求便近唐文故累徙而  
 不進也內清淨以化人外平反以悅親不樂歸美而  
 善隱德故下車無赫赫之聲所去有遺愛之戀有命  
唐文差覆囚山南輜軒所歷全濟甚眾府君以律有  
 違經背禮著妨難十九篇書奏帝下有司而刑定之  
 官黨同妬異竟寢其議道之將廢也歟命也臧倉其  
 如命何調露元年秋奉使晉陽遇疾輦歸藥禱無降  
 冬十二月大漸九日乙卯棄背於縣廨春秋五十有  
 二光珪說不天總角在疚明年春奉輅藁殯於河東



賴夫人撫養孤藐躬加訓授男習文雅女工組繡姻  
 不失親官復其舊景龍元年秋封長樂縣太君夫人  
 故藍田丞威之女也享年七十有二是歲十一月戊  
 申傾背於東都康俗里第於戲哀哉靡瞻靡依何怙  
 何恃二年七月己酉克葬我先公夫人合祔焉從周  
 制也初議葬小子夢度景於萬安山南孤堆東峯之  
 下時淮南宏公相地曰是山為華蓋崗為盤龍龍者  
 大人之德孤者王侯之稱卜夢協兆何善如之乃定  
 墳塋初宅茲所小子銜恤誌之幽礎係曰

欽若古訓時惟皇考翕和三光希聖二老清有世業  
 儉為身寶彌綸典憲思緝王道佐彼四邑人用不擾

生我曷後棄我曷早閔余髻髮遭家不造鳴鳩在桑  
 其子在棘母氏聖善示我顯則命服天朝封邑舊國  
 榮未卒歲哀已匝域泣血思親昊天罔極孤之華蓋  
 土龍蟠連崗四繞帶林巒朝日吐耀遠峯攢微風夕  
 發過蕙蘭石室固護泉火寒衆靈幽謁奉神歡壽宮  
 深靜永閑安

唐故涼州長史元君石柱銘 并序

公諱仁惠字某河南洛陽人也昔帝軒命子爰宅幽  
 都天神降祚遂荒北嶽其後日月運行雲雷經始壇  
 場鄴洛據天地之圖帶礪山河建王侯之國公魏昭  
 成皇帝之十世唐代孫中書令濮陽王順之曾孫也



大父雄魏濮陽王改封武陵王昆吾伯嗣越在濮陽  
 之墟琅琊王子別封武陵之郡宇文朝降為武陵公  
 太府卿秦州總管微子去國不替舊章薛侯來朝於  
 焉降等父胄隋濠豫二州刺史右衛大將軍襲封武  
 陵公翼亮隋室宏濟王基有佐命之元勳承異朝之  
 世祿唐文世祿文武藉甚貽燕深長公受金行之正  
 性承冠世之隆烈幼見歧嶷夙聞聲器靈臺雲秀繩  
 墨之宰無施雅韻天成金石之師何力屬隋網弛秦  
 神棄不歆卿族衣冠日失其序獨寐寤宿永懷盤澗  
 之人藏器待時未射墉之隼唐高祖龍飛天宇鶴版  
 巖林授公右千牛錄事黌開之恩舊也高祖邑子既

與盧綰同衣世祖唐文世祖學徒則有嚴陵共宿久

之以公事免為雋州法曹又歷循州河源滑州靈昌

二縣令克己為政蠻貊化忠信之言唐文直言與人

仕已無喜愠之色永徽在歷石唐文真構難群兇既

剪江界蕭條帝念疲疇茲俾又乃授公睦州雒山

縣令乘駟而往下車作則江通海盜草面來威然後

簡網鳩人峻策羈吏閑田盡闢鰥寡委犬彘之餘絕

澗無遊豪猾屏蚕漁之氣我有禮樂達於山川鬼神

物應休禎孚於鳥獸草木朝廷異之拜朝散大夫行

隆中閩中令未至改授雍州渭南令觀人設教異色

同風遷隆州司馬尋加朝請唐文大夫守涼州都督



府長史分乘兩蕃人康頌作化澄巴濮無侵摘袖之  
 園教溢河湟不飲蒲萄之酒離歌就吳歲夢臨辰命  
 躡脩途榮慙厚德總章二年終於官舍春秋七十有  
 三夫人安定梁氏文伯之妻君子以為知禮孟軻之  
 母良史述唐其能賢齊德茂於昭塗合祔期於幽  
 隧有子懷貞斧藻詩禮佩踐義方承家有馥芝蘭如  
 也歷官右司員外郎太子舍人而罹事徙居復歸舊  
 土履霜露於三紀無改素冠之行違桑梓於千載還  
 守青門之田勤孝在乎追遠豐感思乎備物武陵公  
 之塋域今順陵柏城之內也山園有禁奉瞻靡及粵  
 以聖歷二年歲次月朔別卜宅於咸陽縣肺浮原合

葬焉公孝友純深風標峻起門無雜客家有嚴君而  
 佐郡為邦宏風邁德執法不撓去邪勿疑仲由之政  
 事叔向之遺直豈稱論之典有關軌則之容將隆仰  
 惟代姻恭承哀託郭有道之故事無媿蔡邕趙文子  
 之將遊永懷隨會寓詞楹石式題賢壟其銘曰

大哉乾元 我族資始 有國伊魏 曰天之子

皇義姓風 帝姬氏水 勗業垂統 鬱乎舊史

崇德象賢 允也重軌 貞涵玉性 潤結琬源

武公之子 平王之孫 川流長直 光氣熊渾

孝深柏穎 義重荆璠 白圭比節 黃金敵言

行實剛簡 遊無諂黷 學妙神教 書能鬼哭



避彼屯運 盤桓空谷 四海有王 一旦明目  
 佩此芳草 遷于喬木 亦既從政 淑問克宣  
 秉心如水 臨事如弦 歷宰四邑 高芬屬天  
 元僚兩郡 汪化流泉 江河秦蜀 嘉聲在焉  
 三光西沒 百川東度 天道運迴 人隨代故  
 倏忽三紀 悲涼千露 帝葬橋山 傍孺祖墓  
 天斷舊域 地唐文 地作坤開新路 路即咸陽 阡惟京兆  
 塵歇徑滅 地唐文 長崗龍抱 窰揜銅人 瑩留石鳥

墓誌銘  
 故唐唐唐文 左庶子贈幽州都督元府君



維開元十年正月己未左庶子武陵公河南元公薨  
 於東京留守之內館公諱景懷景懷唐文 字某魏武  
 陵王雄之曾孫右衛大將軍曹之孫贈鄜麟州刺史  
 仁惠之季子昔天啟水行君臨寰海雄圖長發本枝  
 碩茂濟美象賢餘慶不隕公受茲介祉誕膺淑靈幼  
 有純至之節長立公直之操學綜群藝詞擅精微夫  
 其結言以信導物以德清儉足以軌俗真厲足以矯  
 邪故美暢於中名揚於外弱冠以國子進士高第補  
 相王府典籤藩邸擇賢妙盡時選尋以內憂去職重  
 補相王府參軍及明兩昇儲作貞萬國以宮臣除太  
 子通事舍人天授中以親累除名向逾一紀後除直



羅温縣二令雖大位未享通材必入唐文初自太府  
 主簿累入副卿河南椽曹克昇亞尹握蘭右轄綱紀  
 南宮秉茲憲簡肅彼專席再侍儲華卒踐宮相執心  
 好直履法斷恩觸雷霆而除惡不避也枉絲髮而干  
 譽不為也升降兩宮出入三代克慎其始終厥有成  
 君子以為難允哉唐制字其難矣及啟手歸全遺言  
 薄葬家無長物士伏其清年過懸輿人傷其天嗚呼  
 哀哉贈都督幽州諸軍事幽州刺史賻悼之節優於  
 恒數明年二月歸葬于咸陽之舊塋夫人韋氏祔焉  
 禮也夫人即逍遙公敬遠之元孫左常侍希仲之叔  
 姊淑行無徵華年早世其孤彥仲等克遵遺訓靡所

唐文及寘哀說情睦外姻懷深國士既闕西階之奠遠  
 投東武之詞銘曰

卓彼英運 慶靈既長 昭訓夫子 體微知章  
 在藝斯博 於欲則少 徒文其中 莫飾其表  
 惟靜惟默 不激不矯 時經三代 官成兩宮  
 化若風偃 德如澤融 邦稱其直 朝表其忠  
 禮祔周兆 墳瞻漢宮 哀哀純孝 長訢旻穹  
 周故通道館學士張府君墓誌銘

君諱弋字嵩之范陽方城人也其先張仲以孝友佐  
 周子孫醜周仕晉相韓至留侯報韓雝秦興劉滅項  
 為漢世家九代及于漢亂居燕四葉為晉司空混一



天下司空生禕避胡過江六世至太常而復寓于河東之族人君即太常卿隆之曾孫徵君子犯之孫河東從事俊之子性倜儻尚氣節能引弓六鈞命中百步車服出入擬於封君州里頗患之君迺勵操強學不出門者十餘年探道觀奧鬱為淵藪周武帝間之徵為通道館學士既入隋而面其國高尚厥志終於山廬嘗言夷齊清者非達伯鸞曠者非中優哉游哉吾不與也夫人某氏少而嫠居長而喪子流離世故窮盡艱危提攜女姓託身禪宇實有高行之烈隱居之風未遑歸葬有志不就遺恨終天降及曾孫追申情禮景龍三年歲次己酉十月十六日克葬曾王父

曾王母於河東之普救原成先志也銘曰

皇矣烈祖 才雄氣武 不值漢高 空思萬戶  
 一旦折節 十年學古 高步華光 飛纓書府  
 昔有周處 唐文 蛟契虎 易暴以儒 異代同矩  
 周命既沒 鼎遷于隋 仕於二姓 君子不為  
 昭昭盛德 百代之規

唐處士張府君墓誌銘

府君諱恪其先晉人晉有張老韓有開地漢有留侯八代孫皓為司空司空子宇為北平太守遭漢亂離家于范陽至元孫華復為晉司空遇難子孫南渡其處者或寓於蒲版周齊間有歸者因從焉君晉司空



十一代孫也曾祖徵君諱子犯祖河東郡從事諱俊  
 父通道館學士諱弋德音遺範詳諸家謀居孤紹單  
 門傍無兄弟苗而不秀未仕而卒道未融於邦國位  
 未揚於王庭故老之口浸遠好事之書又闕是後生  
 不得預聞焉哀哉嗣子晉州洪洞丞隲襁褓哀麻育  
 於舅氏夫人隴西董氏常州長史雄之女也早年守  
 義唯鞠一子嚴而有檢勤而善訓成先人之丕烈貽  
 後嗣之積善徵太夫人德則張氏幾將墜焉開耀元  
 年十二月二十七日終於廊城縣世婦馮氏之別業  
 春秋七十有二先君之違世也太夫人在堂大門在  
 殯日月逾邁有志未從是諸孫疾焉若履淵谷以景

龍三年歲次己酉冬十月二十六日克葬王父王母  
 於蒲版東司空之村成先志也銘曰

綿綿王父	續我靈基	幼而殞	<small>唐文德 作植德</small>	人莫知之
烈烈王母	克明克類	教我鬻子		光我族嗣
中條之北	大河之東	邱陵桑梓		鬱鬱崇崇
千年啟室	百歲來同	永惟先志		欽成厥終

張說之文集卷第二十



張說之文集卷第二十一  
碑

和麗妃神道碑銘奉勅撰

鄖國長公主神道碑銘

延州豆盧使君萬泉縣主薛氏神道碑

鄭夫人神道碑奉勅撰

穎川郡太夫人陳氏碑

昭容上官氏碑銘

和麗妃神道碑銘奉勅撰并序

舊史云軒轅帝宮次星具黃龍之體郊媒神祀次妃  
成元鳥之命非聖也莫能法天非天也莫能感聖則



有相乎坤而母乎震齊乎古而合乎天跡雖秘絕猶  
 可測而言焉麗妃趙氏天水人也麗者以華美為貴  
 妃者以配合為尊易云日月麗天傳稱星辰合度麗  
 加妃號自我為初原夫八駿勤周肇有封姓三軍霸  
 晉乃蕃卿族設寶符而開國曳珠履而承唐家果  
 驗成宣之後不乏文忠之慶堯門昭殿何代無人暨  
 乎紫氣上通瑤臺獨立楚宮選美納良袂於神雲漢  
 掖求才進團扇於明月故坐而論教則比位三司動  
 而具瞻則儀形六列者矣先將軍以恩澤授職太夫  
 人以有禮封鄭流車躍馬豈無甲觀之親湫宅閑門  
 不有椒房之勢探風揆化憂國如家故聖人有以尚

其德也躬親繭館義形態檻退席以愛禮膠木以廣  
 恩望古艱唐難臻之地必為常踐之域故聖人有以  
 嘉其志也懸象告沴經時寢疾在蒙被之辰荅還輦  
 之問生可捐於浮假心獨係於元真神往上清願承  
 恩而入道形歸不土期去禮而薄葬慈顏同氣奚敢  
 為言皇上閱而許之咨嗟不已開元十四年春秋三  
 十有四七月十四日薨於春華殿殯於龍興觀之精  
 屋示以出家從道例也命河南尹監護河南令副焉  
 喪葬務約成遺語也二十六日窆於故都之後卬山  
 之陽孺慕承華悽唐涼薄室列薤歌於東路迴容  
 衛於北山壽堂一閉兮凡聖等人代同悲兮修短閒



月帔雲衣祿以神仙之服上方陶篋旋於造化之初  
 此皆聖主之曲成賢妃之本志何必雲陽山下別起  
 通靈之臺未央宮中虛立致神之帳若夫易名之典  
 考行是存帝謚曰和禮之貴也氣之和者生萬物聲  
 之和者上下無怨文上作下怨唐魂知後命知後命唐文  
 感聖恩乎有詔史臣恭銘內職事出彤管辭無華飾  
 寫樂池之永傷寄瑤山之罔極銘曰

帝妃佐后實掌陰教八月選才千金聘只禮獻絲繭  
 詩修澣濯婦政可尊嬪風胥劾皎皎漢女為皇降靈  
 娥娥邦媛順道之經結以印綬華光後庭帶之弓韜  
 朗潤前星退唐遐述潛運夙承嘉獎謙苦中京崎嶇

上黨金鏡開明日珠耀掌心方樂於時秦魂奄悲於  
 化往紫雲衣兮霓裳送美人兮北印白壤宮兮青松  
 苑去君恩兮日遠秋風急兮霜天草木黃兮野田滅  
 香容於空擲留畫像於甘泉春秋以麗和之二字獨  
 褒美於千年

鄖國長公主神道碑銘

臣聞堯有娥英承九族之勳序舜有霄燭動百里之  
 光耀大聖之後天必縱之積善之家神所慶矣豈唯  
 上帝之女雲漢為靈平王之孫肅雍其德連華前志  
 世唐代文有其人皇唐鄖國長公主者睿宗之第七女  
 也母曰崔國妃構累聖而成門合濟美而為室蘊乾



坤之純粹演日月之清明神媛誕靈常言所絕免懷  
 之歲天奪聖善不食三日哀比成人文母流胎教之  
 慈曾子得生知之孝由是宮闈延矚邦國遠聞及乎  
 玉笄耀首油駢在馭錫之美地邑以荆山求之令族  
 嬪于薛氏爾其居翫圖史動修法度服其澣濯恭儉  
 之教興鼓其琴瑟敬讓之風被其行已也安親惠下  
 之謂仁敬宗好合之謂義降貴接卑之謂禮恕情周  
 物之謂智推心而行罔不該備其禮家也侍膳饗餼  
 之均和主饋醴醕之品齊絲竹五唐文音之徽靡纂  
 組九華之縟麗經目所涉莫不精詣每至三元上賀  
 五日中參進對詳華折旋舒婉故以式瞻貴里儀唐文



宜作範通門如千花之汎惠風百草之涵膏露窈窕之  
 儀唐文宜宜克舉蕃衍之福大來有男子四子女瑤碧  
 生階芝蘭滿室者也習禮明詩日漸庭闈之訓銀章  
 艾綬地連恩澤之侯自先朝徹宸之辰迄今唐文公  
 主成笄之日外除過制內疾餘哀手寫金字梵經三  
 部躬綉線線佛像二鋪貝葉真偈現心相於銀鈎蓮  
 華妙容呈意生於玉指孝思惟則道遠乎哉開元繼  
 明推恩由已進封郎國長公主食邑一千一唐文百  
 戶田賦廣而彌儉禮秩尊而益恭其後君子晨歌夫  
 人晝哭未亡為稱生意盡矣撫視遺孤將守柏舟之  
 誓志期唐文刺落永從奈苑之遊朝制斷恩改降鄭



氏陵谷可移隋和之德不昧寒暑有遷松筠唐文之  
 性如一均養七子麻廕二宗汾陰之室忘亡榮陽之  
 黨相慶既而善福虛應寢疾彌留盡國醫之伎遠方  
 畢至供御府之藥中使相望命之必至可不支也堂  
 邑山林忽焉瘁色平陽歌舞適足愁人開元十三年  
 二月庚午薨於河南縣之修業里春秋三十有七震  
 悼紫庭哀傷朱卽傾家若墜舉國同悲有詔光祿卿  
 孟溫禮監護喪葬京兆尹能唐馭延休副焉窀穸之  
 禮一如涼國長公主故事夏四月恩旨陪葬於橋林  
 不祔不從古之道也皇上念同氣之致美感閱川之  
 永謝恨棣華之半缺悲瑤草之先化乃命國史昭銘

懿迹降恩禮於雲露寫哀詞於金石水非湘渚還起  
 帝子之祠山是洛陽卽封天妹之塚銘曰

帝系白雲	仙源紫氣	漲家成國	承天祚貴
赫赫聖祖	日文曰武	皇皇睿宗	一變萬邦
挺生淑媛	慈和孝恭	清臚如神	娥眉無雙
卽第立官	湯沐建封	<small>唐文及笄總</small> 爰	禮施環佩
鳴鳳獻祥	乘龍擇對	帝唐降女	天乙歸妹
珠玉過庭	蘋蘩正內	蛟門早聞	龍湖忽上
無地何載	無天何仰	<small>唐文</small> 金殿 <small>作</small> 書經	華絲綉像
欲報之德	昊天罔極	孰是言歸	良人永違
銀爐煙斷	羅幕霜飛	懇願毀形	託身壞衣



不諒人只 改嬪他士 稟命日從 從人日順

息媯繩楚 懷羸霸晉 反經合權 與道同韻

燠休二室 均歡等潤 四海諡清 九族和平

萬物向榮 衆鷄未成 心戀盛明 形隨落英

祖載鼎城 歸宥咸京 挽歌駁聲 鹵簿凶行

哀哀聖情 惻惻同生 橋山片石 千秋令名

延州豆盧使君萬泉縣主薛氏神道碑

或稱達性命者齊生死之域違憂悵唐文者一修短

之數斯蓋無心之論糖儉耳焉足與議於情哉何則

雲虹滅影詞人於是詠謠華秀從風君子為之歎息

豈不以對仙麗之景懷變化而遺戀在韶慈之節悼

零落而偏憤吾見盧氏之子於其伉儷有焉縣主諱

字姓薛氏河東汾陰人唐文下大父駙馬都尉奉宸

將軍諱瓘尚城陽公主考駙馬都尉散騎常侍諱紹

尚鎮國太平公主其在昔也夏有車正先封周有薛

侯爭長其在今也五宗姻於帝里重葉母於王姬河

水經天上積星辰之氣霍山鎮地下多珠玉之林縣

主幼而敏惠長而洵淑貞義孝烈之傳吉凶賓祭之

儀一聞成誦絃緹糾組之製渚毛唐文醞羞之品一

見懸解至乃鶴迴清汎蚕聚崩雲月韻玳砧花穠絲

樹婦人能事咸臻妙焉大聖天后鍊石補天有王母

之神器分茅列地啟弄孫之美邑封猶有禮義引而



親天授三年四月內封萬泉縣主天愛下流日親上  
簡乘龍之舉和鳳為難絡八紘以選門奄千官以求  
俊夫以龍圖帝寶析步搖之華源虎戟侯門襲京燕  
之雄胄人之信美帝用嘉焉以萬歲登封元年仲春  
既望歸於豆盧氏六官送行百寮供事迂以鸞輅遣  
以翟車環珮冕旒璆然在馭黼藻朱黛爛其盈門詔  
婚之禮於焉為盛爾乃移其愛敬以事舅姑伸其友  
恭以諧公妹舉宗洽比如鼓瑟琴每至婚姻會同少  
長咸集珎瓊節步金翠耀首有婉孌之心無驕矜之  
色睇眄睐者若遲日之泛唐文連漪瞻詞氣者猶光  
風之轉蘅蕙加以引納懷和饋分周賑踈屬自附窮

歸忘窘故蘭行彰信於閨門而蕙風滿盈於邦國諒  
惟琬琰之性自美抑亦劬勞之訓致焉中宗孝和皇  
帝雲迴南土龍見東京二儀更闢九族咸敘望我兄  
兮公主贊陶鈞之力曰吾甥也縣主開井邑之賦神  
龍元年春加實封三百戶縣主既通籍門闈奉御又  
尚司殿省天子巡遊宮觀觴樂池臺我有周親無時  
不從主家外幸比齊后而聯恩子壻中叅與趙王而  
均禮或醉飽無憊馱度寒燠未平何嘗不御藥在門  
王人接路當時厚澤莫之尚也景龍四年二月以奉  
御出為丹延二州刺史保傅下堂隨朱轡而同去轡  
唐文輶軒入郡與阜蓋而齊飛辭宮闕而歲闌應庭闈



而日遠肥泉永嘆衰唐氣攻衰楚祝招而不來秦作醫來而不及景雲元年八月二十一日傾逝於延州之廨舍春秋二十有四美玉褫顏明珠晦色平陽舊宇遂無望於歸寧懷縣新文空留連於水逝有子三人西華南容東里等或亂或歧呱呱而泣天何以罰神其忍之冬十有二月五日歸葬於長安唐文下洪瀆原窀穸營護有命加等器服祖遣率由舊章生之也榮葬之也禮若夫柔嘉好合善之原也肅雍降賁謙之道也山河其德容潤廣也熊羆其祥祚胤大也總眾美於修嫫馳落暉於小年此所以哀中之又哀也昔袁亡馬氏蔡筆斯奮鄭喪曹姬藩文亦作矧茲

內範事華無媿砥望夫之石以表靈唐邱緝幼婦之詞將傳終古銘曰

薛之重祖 胄軒國禹 相殷侯周 氏其土宇

英英白雲 鬱彼河汾 公門蕃衍 銘鼎氛氲

則仁則義 則戚則勳 餘慶分唐文祉 誕靈女士

中宗之甥 鎮國之子 皎如霜雪 華如桃李

舜族爰序 堯封咸秩 萬泉開唐文源 三百其實

守盛以儉 居冲不溢 亦既鳴鴈 宜爾家人

謙恭下下 撫納親親 傾財致客 對饁如賓

我有卽第 前臨黃道 我有池塘 却望青草

漢輦停暮 秦簫拂早 歲月易忘 歡愉難保



良人出守 將命北徂 與子偕往 飲別東都

望母腸斷 辭家淚枯 露萎莖草 霜酸衆鷄

魂兮何歸 京兆之野 葬於何處 杜陵之下

巖巖雙闕 列列行櫓 勒是徽音 以觀來者

鄭國夫人神道碑奉 勅撰

鄭國夫人者弘農楊氏之女也開元神武皇帝惠妃

之母曾祖諱謀以禮樂習文為越州司馬祖行以折

衝學武為游擊將軍父宏以門才入仕為雍縣丞而

早卒初則天之代夫人言歸武氏曰恒安郡王生惠

妃及家令忠唐文下有太子二字僕信開元十年三月終于通

化里其四月卜宅于少陵原哀子銜恤號旻仰訴怨

報德而不唐文待託思齊於永慕皇帝悒鸞殿之內

憂悵鶴池之外慘揚淑聲而金石刻揭高行而天地

感國史司文命為鄭志若夫清明下濟嶽瀆上昇祥

會德門慶育邦媛神授孝理之性天啟聰達之心加

以潤澤詩書友唐文玩圖傳伯宗好直預誠將亡重

耳羈遊先稱必霸豈直漢庭章奏假借仲長之才周

官禮儀咨稟宣文之學昌言嘉論有如此者螭首蟻

領修眉橫波既工嘔笑易為容止蕭恭而不跼舒和


而不倨商周革命遇屯有怡懌之顏桑霍傲予在貴

無驕矜之色端容一貞有如此者絃綖祭服闕翟朝

衣纂組入神剪制驚國雕筍唐文之餅唐文露葵之



美五齊六清三翳七醢咸一見而洞理或不習而知  
 和女工中饋有如此者惠妃載誕皇子在者四人驪  
 泉多龍丹穴皆鳳克岐克嶷預見元凱之才寶覃實  
 訐早聞霄燭之豔亦關陰德之潛襲胎教之密傳乎  
 又名子以義成家以禮忠者以令德為忠信者以不  
 欺為信傳云去食存信信而有徵經云移孝為忠孝  
 則不匱周宗咸覆紀季獨存至德深圖有如此者璧  
 司徒之妻邑其合禮南成侯之婦封其舊功况夫慎  
 徽四德四德咸舉經綸二義二義克從匡武牧繼趙  
 之勲產姚承配夏之慶吹凱風於椒掖外王母於梧  
 宮盛德大業窮光極榮唐文寵啟國西鄭不亦宜乎十



數年間二子榮立每至四時令節六參嘉會魚軒照  
 門龜艾交室為壽則珠貝山積侑幣則錦綺霞飛白  
 玉滿堂聚姻親而同有黃金作穴散隣里而無餘君  
 子欽其布義聖人嘉其寶儉故寢疾則飲食天廚湯  
 藥御府匪日伊夕上宮駱驛於閨庭送終則威儀傾  
 都車騎矐目自宮徂野中使相望於道路哀榮之盛  
 書記罕聞猗歟所謂小君之遺美聖善之高烈者也  
 如使後代考南史議西陵披簡牘而歎息臨山源而  
 茫昧旌賁之道不其闕而然則外孫之碑武擔之石  
 非明淑之壘其何設焉辭成進御帝稱曰善顧謂上  
 唐敬扎我其書之於是灑翰黃縑鏤字清琬雲橫波



感神變豔爛於山門鶴倚鸞翔生氣宛延於松路禮  
尊事絕恩崇唐文迹遠斯又元德動天幽誠迴日之  
奇致也誰昔未觀名言莫逮係曰

代有母德厥氏揚兮祖考為士夫為王兮聖后中葉  
總萬方兮天命未改復歸唐兮賢淑啟祐繼絕亡兮  
宗周雖滅神女昌兮建號西鄭榮舊鄉兮魚軒翟茀  
盛龍光兮二子雙飛華綬章兮出入輪奐庭韡煌兮  
去此昭昭即茫茫兮何處詔葬少陵阜兮貴妃慈親  
侯王舅兮寒暑流易山川久兮古墳坡陀老樹朽兮  
壽宮靈寢百代守兮頌石光華千載後兮

潁州郡太夫人陳氏碑

潁川郡太夫人者諱某雷州大首領陳元之女羅州  
大首領揚歷之妻驃騎大將軍兼左驍騎號國公思  
勗之母唐文下陳氏家富兵甲世唐文首唐文矯外  
夫人誕靈豪右淑問幽閑六行天至不因師氏之學  
四德生知無待公宮之教原夫陳本媯水揚承赤泉  
九真為郡良史出乎中國五馬浮江僑人占乎南海  
兩州接畛二門齊望卜妻鳴鳳擇對乘龍揚公有聘  
玉之祥應嫗獲探金之慶號公弱冠昇仕鞠躬禁闈  
唐文正性本乎胎教剛腸形乎義色神龍三年六月  
五日北軍作難西華失守騎入宮壺兵纏御樓公孤  
劍凌鋒群兇奪氣倉卒之際安危是屬既立殊常之



勳遂蒙超次之命授銀青光祿大夫上柱國宏農縣  
唐文作郡公行內常侍其後改拜將軍太夫人是加爵邑  
 高堂九仞重祿萬鍾朝廷美其揚名州黨尊其遠聽  
 夫人富而好儉貴而能勤身却錦綉手親紡績公每  
 昏定晨省夫人必誠之忠孝勤學文武常謂汝唐文  
下有知稱思勗當心念其義父母召之欲汝三思而勗  
 也故號公便習干戈漁獵書史致命伐罪擒叛獠於  
 百越寫誠誓衆破狂蠻於五溪鬪子弟如使手足請  
 風雷若應期契聖朝荅高秩於驃騎酬大封於號畧  
 豈非以辭第之懇忠成斷織之明訓臣節立矣君恩  
 厚矣子孝成矣母慈著矣備此四者善孰加焉抑神

道祐心而人倫興行詩曰母氏聖善又曰宜爾子孫  
 斯實潁川太君之有也享年若干開元九年四月八  
 日薨於長安之翊善里先公早世邱墳故域古無合  
 葬禮有從宜夫以體歸下地萬里豈殊乎黃壤魂何  
 不之雙棺幸同於元室以其年十一月十六日招魂  
 柩葬於萬年縣龍首鄉神鹿里申孝子不忍隔親之  
 情也恩勅賜錢十萬絹布百段日殫忠厚漢武知  
 其母教馮勤寵貴世祖稱其母德克軫天情頗為連  
 類號公生盡其禮沒盡其哀嗟閱水之日逝懼藏山  
 之夜徙追鏤碑板遠貽圖傳蒸蒸至意有足感人控  
 控信言固無媿色銘曰



陳公舜後揚接周裔去國何人南遷幾世郵浸嶂表  
 珠崖海際兩族相京財雄兵銳猗歟邦媛儷茲國士  
 友若琴瑟華如桃李心契法度容和愠喜資敬從夫  
 移忠訓子嘉此令子南溟北歸于天鶴唳拔渝鴻飛  
 朱宮退敵銅柱來威國安家寵魚軒翟衣子封號國  
 五公前宇母邑潁川二唐文君舊土感激榮慶踟躕  
 今古高堂夜空帛容朝聚龍首山前前臨灞川招魂  
 五嶺合葬三泉山山邱墓樹樹風煙孝碑不滅慈墳  
 永傳

昭容上官氏碑銘齊公序

天降時雨山川出雲乃生靈媛祚我聖君精微其道

煥炳其文三光錯行昭容綱紀百揆繁會昭容條理  
 外圖邦政內諗天子憂在進賢思求多士忠孝心感  
 天焉報之吉凶有數邱焉禱之如彼九日昇焉暴之  
 如彼三良秦焉悼之漢宮選才班氏其特楚史書霸  
 樊妹之力或穆齊公敘明其德嗟爾彤管是鑒是則

張說之文集卷第二十一



張說之文集卷二十二  
墓誌

中書令逍遙公墓誌銘

岐州刺史平原男陸君墓誌銘

恒州長史張府君墓誌銘

馮潘州墓誌銘唐文作贈潘州刺史馮君墓誌銘

贈郎將葛君墓誌銘

四門助教尹先生墓誌銘

元州司戶上柱國呂君墓誌銘

徐氏子墓誌銘

鳳閣尹舍人墓銘子曲阿令墓銘



司屬主簿博陵崔訥妻劉氏墓誌銘

中書令逍遙公墓誌銘

唐故中書令逍遙公韋氏諱嗣立字延構京兆杜陵人也受渾元之正性挺生人之秀傑門為孝悌之府世處台衡之地有唐文下士林之高標宗臣之首出者也生於秦之清水長於鄭之成皋聰明先覺博古兼覽究蓬山之百氏綜闕里之六藝文而不華實而不滯原夫志在於易行在於禮守橐籥之冲虛播朱絃之愷悌事有則而言有度神無方而用無體其與人

也溫良善誘仁恕多容俾夫頑蔽開析復驚擾從君子進道小人草慮聞者願來見者忘去若膏澤之浸



陽和之感萬物不知其化及矣夫覆篲登朝濫觴宰邑聖朝知其周慎忠肅簡易循良是以綢繆兩禁重疊千里迄踐宰衡終厥有成凡化二邑理七郡三入中書再統兵部選兵吏各兩冬典樞密共五載光弼四主厯政三十有餘其間累有傍唐文及官因左退日月蝕而更明隨和幽而不昧爾其為邦設教遵德閑邪身勤心苦誠感物化禮讓興於私室刑罰廢於公家衡鏡尚懸文武矯首才無我失善若已有風流名教作法垂後訐謨皇極功格天地茫茫蠢蠢既生既遂四夷來王五靈皆至然而外榮中素迹邇心遐杳然朱戶之若喪邈矣赤松之可接西宴驪山之谷



東息龍池之野擇逍遙而建號裂土宇而開社即明  
 主封立帝之謀表高臣之志也公考侍中為國元輔  
 公兄承慶當代齊名咸以令德繼和金鼎扶陽二相  
 陳氏三君復追美矣侍中前夫人崔氏生黃門而即  
 世後夫人王氏生公而偏愛公克諧以孝因心則友  
 啟均養之德成無間之言天下之人比之祥覽惟公  
 德行言語文學政事四者實總而兼之事親養志而  
 能爭居喪過哀而顧禮此唐文下善中之善者也善  
 人天之經也國之寶也道將興廢木鐸之用有時命  
 或推移蒼生之望恒在春秋六十邁疾陳郡還醫洛  
 師開元七年九月二日薨于歸德里有詔贈兵部尚

書謚曰某唐禮也明年某月葬于某地有子孚恒

濟史唐文倜然在疾靡所寘哀以某忝縉雲之舊寮

沐清風之餘論入難名之閭域窺妙德之形容見託

銘誌庶傳精爽至於歷官次序平居事業當見郡府

遺愛之碑國史名臣之傳故不存焉銘曰

峩峩仁公 抱孝含忠 文獻則足 高明有融

翻飛王佐 穆我清風 道濟明時 心樂幽地

薛夜華衮 坦然一致 逍遙啟封 帶礪傳唐文

生涯共盡 振古其常 人秉三德 天歸百祥

臧孫有後 公業不亡

岐州刺史平泉男陸君墓誌銘



開元十三年十一月六日故岐州刺史平原男陸公  
 卒于京師十四年冬十唐文月葬于鄴西之先塋  
 公諱伯玉字某河南人識真之士也夫譽其克家光  
 乎觀國篤慈惠以宰邑宏雅量以執憲擅華妙於禮  
 聞敷文敏於禁掖推直方以獨坐率易簡以專誠所  
 居而美風振所蒞而德聲溢非德充於我唐文而美  
 形乎外者焉若是夫孝盡愛敬之衷悌色友順之節  
 仁協返身之恕義適成物之和四者禮之善物歟吾  
 友嘗從事於斯矣然而舉禮之綱持心之柄靜則樂  
 先生之道動則濟賢人之業位不盈量年無登壽之  
 才也之命也復焉可得而言哉銘曰

陸侯泉妙	體曠心古	龍章炳文	麟角藏武
橐籥冲用	詩書義府	移孝則忠	安親合主
乃建侯社	乃牧王畿	有嚴有翼	有長有威
汲直謝病	秦和不醫	乞言未老	啟手全歸
石鼓東臨	銅臺西望	別業宛在	舊塋增創
弱子攀車	孀妻送葬	風景飄忽	山川惆悵
令德可傳	浮生匪重	神去一息	形遺萬種

霜唐文往草陳

露唐文來樹拱

一仁唐文去兮唐文仁兮唐文復唐文

一義長蕪唐文

沒於邱龍

相州刺史張府君墓誌銘

君諱承休字某吳郡吳人也留侯典漢播美西京長



沙徒吳蔽蔓東土曾祖冲在陳為文帝師入隋為漢  
 王學士祖後肩授經太宗尊之以祭酒既封新野又  
 贈以宗伯考少師位不充量止於朱陽宰班固稱世  
 名忠孝魏武謂積善之家昌門一系暉武諸族君受  
 天戩穀傳家業藝希言敦行去華崇實非法不由非  
 禮不動精於物理敏於政事初以南郊齋郎補兗州  
 兵曹丁太夫人憂廬墓三年加人一等再任始州司  
 倉應八科舉改鄭州錄事參軍又舉賢良方正遷揚  
 州司錄參軍移蘇州常熟令歷政皆有能名加朝散  
 大夫入為司農丞實掌錢穀嘉傲息望使覆囚嶺南  
 是司獄訟聽折惟允迺授濟源令風行畿甸河潤洛

師加朝議大夫上柱國拜隆州司馬轉恒州長史簡  
 而有孚權而中道嬰風恙去職就醫還京春秋六十  
 有二終於頌政里夫人成紀郡君天水秦氏廬陵郡  
 公行師之孫嗣公遊福之女敬事君子訓成唐文訓  
 訓諸孤當代之孟母也年六十二終於許州開元九  
 年十月某日合葬於武功之禮讓原禮也夫道大難  
 合任屯而不進德高有後身沒而福流君同生八人  
 半服銀艾祚胤五子率為珪璋比迹於燭煌六龍南  
 鄭千室德門濟美信有徵乎懼陵谷或遷乃勒銘沈  
 石銘曰

思文留侯 時惟皇祖 長沙南守

分韓唐文東土



家有道書 門傳兩唐文府 嵬峩重世 通經二主

誕靈上哲 克廣斯文 造次仁義 優游典墳

孝乎事親 忠乎事君 猗那叔父 亦足有云

馮潘州墓誌銘唐文作贈潘州刺史馮君墓誌銘

公諱君衡字正平廣管高州人也昔畢萬苗裔邑于

馮城因以為氏其適越者則表宏過江錄所載長樂

馮祖思唐文之後也遠居僻地代為右族帶甲千人

擬四豪之公子田洞百里齊萬戶之封君祖盡持節

總管高州都督耿國公薨贈左驍衛大將軍荊州大

都督恩命分府為三州授君之三子子智幾唐文高

州刺史子智玳恩州刺史猶唐文子子游潘州刺史

公荊州之孫恩州之子量包山海氣逸風雲陰德以濟物力行以游道散岸從心乘化而沒斯實一方超邁全真之士也夫人南海郡太夫人姜氏誕嫔勳門

作嬪傑室初執奠妻之禮終抗梁寡之行即大將軍宿國猛公鐵杖之曾孫女也夫人有三子一女同歸

上京長子元璉左衛中候次子元珪左領軍衛即將少子力士右監門衛大將軍唐文下有以少養於高

氏故舉家從其姓焉夫德厚者福長先否者終泰天之報應豈虛也哉大將軍所以雲漢奮飛忠孝至感

迎聖善於炎海展三牲之色養拔友于於荒徼會四

鳥唐文之嚶鳴搢紳美談簪紱傾慕是知敬仲羈旅



將育于齊孟軻儒藝成名此母信瑰才之特達亦餘  
慶之助臻乎夫人享年八十有七開元十七年五月  
十二日薨于西京來庭里粵以文無唐八月二十二  
日安厝於長樂原之新城憫將軍之純至嘉先士之  
晦名思詔追贈潘州刺史招魂而合葬焉蓋殊常之  
禮若夫慈以遺後孝以揚親忠能合聖惠足昭仁嗟  
乎馮氏之子具此四德鏤石垂文為不朽矣銘曰  
潘州違世 滅迹沈彩 詔贈本邦 光燦南海  
其孤永慕 昊天不待唐文 夫人處順 奄背榮膺  
悲離兩鄉 魂合雙襯 孝心可贈 百年匪悵  
天日蒼蒼 邱壠茫茫 地名長樂 人樂無長

郭門之外 愁生白楊

贈郎將葛君墓誌銘

公諱威德字某唐文下有葛氏本梁國寧陵人也因遷  
徙今居京兆涇陽縣父寶未仕早世公室无陶白之  
資朝無金張之援不承過庭之訓不漸鼓篋之術而  
能奮飛喬木獨拔深濟富忠孝而由已善射馭而聞  
天早以武藝妙選供奉每扈遊別館侍蹕禁林何嘗  
不左發五紆傍連雙兔歲久拜元城府左果毅都尉  
尋加上柱國入陪内杖思馬斯才出典外軍握兵之  
要所謂白桂唐文作珪特達青雲自致者也其用未展其  
生有涯神功二年某月日終於東都私第殯北邙之



山之山唐原文夫人太原郡太夫人郭氏從夫有禮以子而貴開元八年十一月薨於京師之修真里有子福順克家用孝開國惟忠泣風樹之無追痛榮祿之不逮哀戚之情上感飾終之澤下流寃宥有期祖奠將設有詔贈左唐文驍衛郎將開元九年二月七日合葬於長安縣龍首鄉禮也鬱鬱宰樹蒼蒼墓田恐佳城之見日祕銘石於重泉詞曰

都尉武達夫人禮封令德高行譽偶名雙自古迄今仁賢同盡唯傳忠孝餘慶不泯


四門助教尹先生墓誌銘

先生諱守貞天水冀人蓋好古博學作好古博學唐文

者也本乎官族稱為尹氏昔有伊佚司周太史暨乃吉甫勤於宣王格言大勳布在詩傳遠祖緯魏僕射曾祖欣隋開府大父珍唐棣州蒲臺令父文唐通州三岡令先生積德餘慶天錫純嘏愿而克恭情與禮合七歲誦爾雅能通書契訓詁之義識草木鳥獸之名十五誦三禮能明君臣父子之道定郊廟吉凶之制二十誦春秋尚書能精五行九疇之數斷雅頌之同唐文之節二十五誦詩及易能辨政教雅頌之始極變化生生之至又能誦古史百家之書善文章草隸之則恥夫流俗實嚮聲飾華褻未故每外和內厲元元本本學者如斯不舍晝夜垂拱四年以明經高



第遂授大成自延載之後條限賓薦長安之初大開  
 貢舉考功是歲千五百餘人召先生課覈淑慝時稱  
 無滯學唐文無學矣天子聞其進通經術乃下制曰成均  
 大成尹守貞業隆時習功宣日就有勵於分陰俾參  
 榮於杖席可四門助教誥誥青襟有所仰矣長安二  
 年六月十日晝寢忽夢麟臺兩局爭召修文覺而歎  
 曰十二日稷吾當往矣因命親族序訣至日安枕俟  
 期俄然而卒春秋四十可謂古之達化知命者也嗚  
 呼天與之德而不永其年天與之才而不大其位可  
 乎粵七月十七日葬於高陽原先君之舊塋銘曰  
 尹氏之子 其殆庶幾 為仁由已 三月不違



謙成德柄 學也身基 辟雍洋洋 可以療飢  
 環林之下 可以棲遲 我實道貴 人言位微  
 修文地下 前哲同歸 子之知命 將歿先期  
 朝衣東首 精魄高飛 人之云亡 胡不悽而  
 高陽之原 有匪其側 郭門直視 松柏一色  
 邱隴累累 阡陌誰識 浮焉休焉 為我心惻  
 元州司戶上柱國呂君墓誌銘

公諱虔字某其先東平人也堯之太嶽始封呂侯周  
 之太師實表齊國河西則霸王繼代關東則丞相聯  
 華近徙河間是稱右族大父贇隋幽州都督府長史  
 考師滄州清池令並振羽儀馳聲郡邑公孝悌天至



福樂唐祿混成千里聞騏驥之才五都重琅玕之價  
 壯士行去樹勳於塞垣君子居之何陋於蕃郡以上  
 柱國為元州司戶參軍積善襲於家風餘慶流於身  
 後享年若干而卒夫人河清縣太君傅氏四德爰備  
 六行聿修始則賓於莫妻終乃唐訓成孟母春秋  
 若干而終開元十四年某月合葬於州城西南里之  
 平原禮也我有令子職司馬於小山我有淑孫偶乘  
 龍於大樹榮哀之事于茲畢矣銘曰

堂堂呂公

休有令德

穆穆傅氏唐文

順成內則

兩譽齊振

雙儀不忒

景行山東

風流河北

有生必謝

誰能獨存

神寧故里

合葬平原

劍暗泉室

松塞墓門

勒銘沈礎

萬古何言

徐氏子墓誌銘

徐氏子者名巖字某司封員外郎堅之第四子也驥  
 子晚雲鳳毛洗日孝友因性唐聰敏若神置在膝  
 前已會星辰之氣戲於牀下能記賓主之詞及總角  
 成童精意好學問一知十升堂觀奧下筆成章而倫  
 要發言為論而卓詭識者咸謂增世構之崇蘊益源  
 流之洪潤雖甘茂之孫十二飛辯班彪之子九歲能  
 文不尚之也天乎何辜顏項無命年十有三歲大足  
 九唐年九月遭疾而歿嗚呼哀哉瑀月始生不見  
 其盈瓊枝方秀不見其茂悲哉銘曰



生日何淺 死路何深 珠碎朧月 花殘稚林  
哀哀父母 孰處其心

鳳閣尹舍人父墓誌

峩峩尹氏太古之風發源堯師中葉周卿爰暨初考  
咸有頌聲猗歟府君代烈增盛孝行之本謙德之柄  
耽樂道真含光無競三典郡土五形以正再司府承  
百工興詠茫茫大造物生遂性虛無宰之孰能力爭  
位不克德優游天命身歿道存同符孔聖是有才子  
克成餘慶

子曲阿令誌銘

存為神鑑 及為國殤 惟呂惟予 同歸義方

司屬主簿博陵崔訥妻劉氏墓誌銘

夫人劉氏其先彭城人也隋毗陵郡通守子將之曾  
孫唐滁州刺史德祖之孫汾州刺史延嗣之女也昔  
武子處秦厥初令氏元王國楚是焉昌族盛德之門  
龍驥接彩世祿之胄龜席唐文聯華夫人璇室載蘭  
蕙林曾秀喈喈黃鳥豔豔清明聞詩聞禮竊比諸生  
茂行淵心實稱士女及鳳飛啟繇夫婦盡琴瑟之和  
雞鳴咸纒舅姑移喬梓之敬友愛洽乎似媚唐文任  
恤周乎姻戚豈惟禮備澄幕唐文工深機杼固以能  
循法度宜其室家矣年若干以大足元年七月某日  
寢疾而卒粵二十九日某辰假葬於某里夫國喪賢



頻家亡淑媛母氏垂白殞奪所懷稚子始孩翦焉無  
倚嗚呼天道輔仁人道與順眷茲七糖丈德不遐三  
壽何哉報應之理豈神食其言脩短之期將事歸於  
命外姻畢萃累歎不足糖定夫人即吾嫂也今薄誤  
素履永刊幽石圖史之外有美存焉其銘曰

崔實齊曹 劉亦漢宗 崇其顯媾 望偶族雙

閻闈是穆 饋奠斯恭 貞歌浮漢 孝室洞江

珪璋其節 桃李其容 宜享偕老 胡寧鞠凶

朝槿飛陌 春蘿墜松 夫傷子慕 去此何從

百歲之後 魂兮合封

張說之文集卷二十二

張說之文集卷第二十三

雜著

弔陳司馬書

弔國傷文

奉勅赤帝壇祈雨文

祭城隍文

榮城門文

祭江祈晴文

賽江文

祭殷仲堪羊叔子文

祭霍山文



祭崔侍郎文

為河內王作祭陸冀州文

為魏元忠作祭石嶺戰亡兵士文

為魏元忠作祭石嶺沒陷士女文

為人作祭弟文

為人作祭弟文


為人作祭舅文

祭和靜縣主文

為將軍高力士祭父文

為妓人祭故主故主唐文  
元十郎文

弔陳司馬書



正月癸亥孤子范陽張說頓首頓首陳君之靈頃伏

苦蓋遠辱慰疏執對號慟次於展洩來使未還傳君

遇禍盡哀寢外傷心痛骨明府兄毓德南邦飛聲中

夏急人之急憂人之憂勇於履危果於從政入使天

闕有專對之美按俗交州見澄清之節故得振衣衡

管割錦閩鄉越嶂舊風人狃輕剽換之以淳俗格之

以華章矯枉過中斯害也已齒由剛折膏為明銷鳴

呼陳君婞直而殞皇天輔德問之何故疇昔炎海契

濶周旋義則友朋恩結兄弟方期歲暮熒熒相榮元

髮未華何圖零落山濤猶在嵇紹不孤逝者有知當

昭是意今返防闕唐駁力報前書幽明雖異交友無



改悲言下筆涕泗從之并往千錢俾陳奠酬歛歛萬里哀哉奈何說頓首再拜

弔國傷文

北伐兮東胡邈遼陽兮孤竹偏師兮覆衆在崇山兮峽谷露芄芄兮蔓草風蓊蓊兮拱木見馬血兮夜燃聞殤魂兮雨哭君王按金鼓而氣憤唐文憤撫珠鈴而淚滋橫萬里兮抽恨弔群山而寫悲懟凶將兮我辱悼勇夫之秋累彼前鑒兮未遠何後來者不追對死地兮出陣臨傷門兮用師軍奪帥兮虹食壘車脫輻兮火焚旗有纛鷹兮復矣無范宣兮媿之命窮迨兮短兵錯膚鈍唐文刃兮血染鍔旅唐文旋殘潰兮棄組

練山猶號兮谷餘戰殪原野兮奈何違君親兮不見於戲何天命之奄忽俾仁義之禮兵為蠻夷之俘骨唐文醜六校之飛將唐文闐五營之勁卒吾見出兮不歸噫名存方身歿

奉勅赤帝壇祈雨文

維開元十年歲次壬戌四月壬申朔十四日乙酉曾臣臣侍中源乾曜中書令張嘉貞兵部尚書張說謹以清酌昭告于赤帝自冬涉春至茲夏首宿麥將秀時雨未洽皇帝降服減膳避正廢懸恐害梁盛是憂黎庶仁旨之勤已極兆人之感未通何辜于天而此不惠曾臣源乾曜等同力聖日無敢怠荒薄才執政



多所不及神則不雨或此之由內訟恒惶莫知啟處  
曾臣等若上無補袞下不利人妨功害能負恩竊位  
惟神臨照簡擇其心降禍厥身墜祿損命三臣當咎  
足謝天責萬姓何辜俾失農望今因夏享展禮既終  
上抒聖衷懇祈人命至誠必感佇流嘉液旨酒獻誠  
神其尚享

祭城隍文

維大唐開元五年歲次丁巳四月庚午朔二十日巳  
丑歲次至巳丑荆州大都督府長史上柱國燕國公  
說謹以清酌之奠敢昭告于城隍之神山澤以通氣  
為靈城隍以積陰為德致和產物助天育人人之仰

恩是關祀典說恭承朝命綱紀南邦式崇薦禮以展  
勤敬庶降福四毗登我百穀猛獸不搏毒蟲不噬精  
誠或通昭鑒非遠尚享

崇城門文

維唐大文唐開元五年荆州大都督府長史上柱國燕  
國公張說謹遣議郎行錄事參軍皇甫嶧敢謹遣至  
增入昭告于大府城門天有三光地有五行陰陽順  
序庶物以生霖雨過旬晦昧不晴奈何以陰賊陽以  
蒙蔽明恐害嘉穀無奉粢盛維爾崇墉本人所營積  
陰攸處德在助成苟人是利亦神之臧速收雲雨以  
復天常報爾特豚薦爾馨香謹以清酌脯醢式陳崇



事尚享

祭江祈晴文

滔滔大江南國之紀協靈通氣降福禦灾是載方冊  
 代存祀典歲維季秋唐文季秋唐文苗稼大熟霖雨霖雨  
霖雨猥集農夫未收油油抗稻垂生芽蘖上則神威  
 將廢下則人心何仰公私憂窘靡禱不周訴爾明靈  
 撤此雲雨欽儲牲幣俟荅神休謹以唐文下嘉酌脯醢敬  
 崇禋請

賽江文

年月唐文下日具官某敢昭告于大江之神王有百  
 谷禮尊四瀆善利維神朝海作賓發源岐山駕福來

臻率此荆土明靈是主已成嘉穀垂敗霖雨聽我虔  
 祈福唐文我農畝既曠既獲既場既庾欣欣衆心願  
 荅神祐潔牲明酌寅奠江浦

祭躬仲堪羊叔子文 并序

荆州府城中西北隅舊有躬仲堪祠某到官廣其堂  
 立羊叔子廟像成而祭之

維年月日唐文作維開元六年荆州大都督長史燕  
 國公范陽張某謹遣功曹參軍吳興沈從訓敢昭告  
 於晉羊躬二荆州之神我聞立人之道曰仁與義仁  
 者孝之先義者忠之主躬公為孝子羊公維忠臣行  
 植晉國德施荆人不孤其美是建為隣雙風雖舊二



廟維新凡百君子高山仰止馨香以時敬恭明祀尚饗

祭霍山文

長安二年月日皇帝使并州道大行軍副大總管尹元凱等敬薦酒脯敢告霍山之神皇帝天覆萬物各遂其性祠于群神罔不咸秩獨彼凶虜默啜恃天虐人窺邊猾夏畧無寧歲皇帝哀此黎獻勤於征役憫彼夷落毒於昏暴常欲誅其魁首安是蕃毗寇虐盈稔神人同棄今日送死并朔驚近驚近唐文山陵命將出師冀行天罰惟神炳靈參野作鎮奠方歆是正直贊揚威武俾胡馬化為沙蟲王師衆於草木獻捷

之日昭報神休尚享

祭崔侍郎文

維神龍三年月朔日兵部郎中員外曹良史等謹以清酌少牢之奠敬祭故侍郎崔公之靈位以行成名以才起天臨明代是生君子長戟高門層堂峻趾友孝友孝唐文仁愛衣冠標軌清通正直省閣條理束帶立朝惟國之俊抑揚吐納金聲玉振器不滯方神無留韻厚奉外不為假坦率內不違真汎交而容博好施而能均欲人規已怒已及人故者不遺其故親者無唐文失其親厯否泰能全其節故令名不離其身方齊六相助明三辰何孤我德何負茲神搏空落



羽中駕摧輪昔時寮列今為弔賓凡二三子夙承遊  
唐文春聯務七兵歲陽三變分與時積事由更練  
 審公庭申申私宴慟音徽之永掩懷儀範之不見  
 容止於綴足潛眉目於蒙面哀哉奈何涕零如霰  
 惟初疾以迄將亡意氣精爽乾乾自強顧瞻賓客  
 勉矜莊几不側弁衾無解裳話言靜密憂公不忘  
 猶看駿馬尚聽名倡靡神不禱靡藥不嘗倏焉  
唐文宿俄唐文歸渺茫歲初置酒春中酬觴何吉凶之共  
 域同歌哭於此堂自古及今人誰不沒豈歎生死  
 所歎唐文倉卒修途未半壯志先伐莞子亂年遺  
 骨數月在親親與懷舊孰不傷心而痛骨虛  
唐文奠易收

深悲難歇尚享

為河內王作祭陸冀州文

維萬歲通天元年月唐文下日神兵道大總管河北

道安唐文撫使右金吾衛大將軍河內郡王以少牢

之奠致祭故冀州刺史陸君之靈戎羯不道侵軼幽

都凶渠殄唐文滅餘燎星鋪鳴弓扶唐文柳飲馬集

唐文蓋集唐文同惡難起無虞臬獍為旅鯨

鯢有族裳旗耒兵剌荻弦木叛唐文潑換吞噬睚眦觸

逐亂舞梯衡唐文潛攻版築鑿齒爭厲熊蹯未熟踰

垣自潰守陴皆哭高高已陷連樓唐文復焚人類薙

草城隨壞雲僵屍暴骨藉藉紛紛嗟嗟使君死節無



怯政寬成俗兵機不振狡爾猖狂難以德鎮城為讎  
 保身膏虜刃明明上帝仁覆憫下赫赫神兵馳唐文  
 馳在野朝告夕起唐文如何不及將守非堅為寇是  
 急救兵適來涉血猶濕三軍雷歎百城雨泣天子命  
 我董戎冀方旌旗介胄千里相望既掃氛濁言巡戰  
 場輯穆人吏撫寧孤孀徘徊城府悽愴甘棠禮重王  
 事哀深國殤魂兮有感歆此嘉嘗尚饗

為魏元忠作祭石嶺戰亡兵士文

維長安二年月唐文下日勅唐文下有并州道行軍  
政御史大夫同鳳閣鸞臺三品兼知并州事魏元忠唐文下有并州道行軍  
 果之奠致祭于石嶺戰亡兵士之靈戎羯慢天南牧

吠主石嶺橫地北都高戶與我王卒保界并土如何  
 不弔罹此寇虜列鎮既嚴連巖既削攻則路險守非  
 城惡彼謀匪臧實愆偕作援絕兵滅塘澁軍孤勢弱  
 地拒兩陁山望雙崢胡塵大起白刃交錯石盡矢窮  
 旗焚胄落嗟爾戰夫烈烈忠勇奮不顧命志無旋踵  
 身沒名揚生輕義重天子命我理兵晉陽思與士眾  
 底寧遐荒痛茲壯士翦為國殤盍訴天帝降厲鬼方  
 助氣金鼓復怨沙場虜血爾酬虜醢爾嘗封尸唐文  
 死所招魂故鄉尚享

為魏元忠作祭石嶺沒陷士女文

維長安二年月唐文下日勅唐文下有并州道行軍  
政御史大夫同鳳閣鸞臺三品兼知并州事



政御史大夫同鳳閣鸞魏元忠以酒脯時果之奠致  
臺三品兼知并州事祭石嶺死喪百姓之靈唐文北胡自擅賊虐不道氣  
悍朔風馬肥秋草侵軼郡縣驚逼稚老奔走山軍唐文  
作是障是保兵不善守將不遠謀如何滅竈無復燒  
牛俾爾士女燿于寇讎魂飛狄刃血迸氈裘殤悲雨  
哭氣怨天愁總兵帝鄉言念北阜抗憤戎漠傷心按  
部泣弔郊童哀問田叟為爾修惡誓滅群醜蹴踏蘭  
山脂膏葦藪誠若克就沒亦不朽慰爾眾靈酬此簞  
酒尚享

為人作祭弟文

維景龍元唐文三年歲次庚戌有月日期朔正月日朔唐文作

日丁從兄兵部尚書某以清齋唐文酌少宰之奠致祭  
于故將軍弟之靈欽若貽宴俾降戩穀神祚玉衣天  
開金屋繇系溢寵諸宗橫福覩交泰之二儀承序殷  
之九族引同本於條翰合分流於昭穆義有感而意  
深恩無方而情篤况且唐文山慕喬頂林晞秀木深  
仁遠慶侯子能復何從才之有餘而輔德之不足舉  
朝野而皆痛在密愛而尤酷嗚呼哀哉永懷令弟言  
念生平蘭華雪豔玉潤珠清禮樂懸解文章挺生三  
篋暗記千門畫成風流望美月旦傾聲掌北軍之師  
律首東觀之詞英偉壯夫之獻頌善仁者之論兵賧  
新豐而臨幸遶湯井而連營那唐文奉車之暴逝忽



復綏而凶行軫天悲於宸掖固聚族於華京惠連詩  
夢子敬琴情儻昭昭之不泯知親親之素誠嗚呼哀  
哉尚享

為人作祭弟文

維年月日兄某致祭于亡弟尚書之靈天實喪子不  
慙遺善家殞玉樹國墜寶臣嗚呼執柔何痛之甚嗟  
予與爾夙遭閔凶哀惇相鞠殆及長成爾性歧實岐實  
唐文作穎穎德表宣慈居盡友悌之心言必忠貞  
之事繇繇我族俟子而大奉祖德之令圖荷朝戚之  
渥惠白首相對紫綬雙紆爾既秉國鈞既敷朝典出  
牧千里入宰六官予聞爾言嘗誠過寵余嘉爾行在

貴能卑清靜

唐文作

温恭每希於上士飲食車馬不越

於平人每思與爾歸印東都懸輿故里揚名講德居

常待終當謂老夫沒於汝手不圖令弟殞自我唐文

先及爾纏疴屬予伏枕不見數日長悲九泉嗚呼刊

迷未成平生已盡髮膚猶在魂魄焉知聞爾屬續之

辰託予身外之事薄葬之禮還從爾心字孤之情不

待遺意所恨在疾不視於喪不臨沈綿唐文苦懷纏

迫斯甚予羸老矣傷心幾何人琴兩亡命也命也

為鄭虛已作祭舅文

維年月日外甥虛已謹以清酌少牢之奠敬祭于故  
汴州司馬四舅之靈釁積周親天禍外氏仁舅捐館



靈輜祖庭四海喪其範儀九族失其陰潤感今循昔  
 觸緒增悲恭惟先門逮舅平日淵流莫逆道術同歸  
 穆齊鄭之累姻深言孫之至友及鞠凶之際創巨失  
 圖賜唐贈厚獲葬之恩事優含哺之育顧省全立功  
 歸撫惠竊荷濟於百罹思効過於一等豈期唐其德  
 素積而力莫疇願未申而禍先集不孤之託緬爾何  
 依猶父之心忽焉罔報冥昧靡覩存亡永違執饋奉  
 酬五性含塞幽靈昭察當歆宿誠

祭和靜縣主文

維年月日敬祭薛氏太夫人和靜縣主之靈惟夫人  
 軒廷繁祉羸臺淑承訓公宮宜家卿族博士學藝尚

書題目法度蘋蘩儀刑松菊夫拜中令昔同鮑婦予  
 昇瑣闥今類馮母舉按如賓闔門誠友在貴能降居  
 貧施厚天道初草王風變韶維城落構若木疎條欽  
 聞積善智洽仁糖昭克庇二族命服兩朝肅肅柔  
 和如風是暢娥娥女師如月斯望潘輿獻壽仲祿方  
 養不弔昊天何德之喪嗚呼哀哉洛邑啟殯長安歸  
 陌哭慟高臺旌懸舊宅階濕夜露庭陰曉魄嗟我外  
 姻俱成弔客

為將軍高力士祭父文

維開元十七年月日孝子力士敢告于考潘州府君  
 妣南海太君之靈小子不天夙齡凶閔山閔唐文身



嬰寇剽家值虜裂幸供掃灑掃灑唐文之餘遂蒙侍  
 從之顧扶戴明聖逼畏艱難大固不敢不密小亦不  
 敢不誠事必記心言無漏口日慎一日將二十年玉  
 弁加首金章在佩先靈納祐明神降鑒阿母遠至於  
 京華妹兄自拔于泥滓咸以官漸榮祿姻通士林慈  
 顏顧復顧復唐文於目前同氣展歡於膝下又緣幼  
 育高氏變族移家愛敬愛敬唐文盡於二堂溫清周  
 於一紀不圖無狀招禍永見孤棄聖主恩華曲逮存  
 歿邑封舊郡官贈本邦親感恩澤子承父意致命報  
 天誓有同於皦日竭忠資孝志無忝於幽泉敬惟靈  
 懷慰聞昭遂先遠有日卜兆新塋遙啟尊魂合祔良

壤哀迫祖載攀戀須臾謹以清酌少牢恭陳遣奠盈  
 罇不舉虛饌莫嘗號天叩地殞絕何仰

為妓人祭故主文故主唐文元十郎

維年月日年月日唐文神故妓人伏十善謹以清

酌少牢之奠敬祭于元十郎之靈渌流茂樹萍蘿是  
 依山崩川竭魚鳥何歸恭惟主君高才達節賞心樂  
 事風流不絕歌豔露華舞迴春雪幸持此技承君餘  
 悅綺羅脂粉嬌上春自言終世唐文代寶情親寧知一  
 旦君恩斷繁絃清管為何人懷主君之異顧願徇命  
 於九原唐文迫夫人之嚴旨逐投足於他門生有十  
 年之愛沒無一日之恩雖強容飾於新奉心摧絕而



不敢言君子廣德仁心必遍疇昔與君琴樽懽宴永  
懷蕙歎俯憐荼苦錫以時珍申哀故宇廢車既展祖  
奠斯開悲歌助挽長袖承盃平居好此魂來不來心  
思往而莫遂足欲返而遲迴終天地於此訣毒煩冤  
而難裁

山房校鈔書籍

張說之文集卷二十三

張說之文集卷第二十四  
表

百官請不從靈駕表

為留守奏慶山醴泉表

為留守奏瑞禾杏表

為留守作賀岷山表

為留守奏羊乳麋表

為留守奏嘉禾表

為清邊道大總管建安王奏失利表

為建安王謝賜衣及藥表

為建安王讓羽林衛大將軍兼檢檢司賓卿



表

為薛稷讓官表

為郭振讓官表

為僧普潤辭公封表

百官請不從靈駕表

為李嶠作

臣某等言伏以靈駕首途聖恩攀從國計非便群情不安冒昧上祈未蒙哀允跪拜還旨載深惶惕臣某等誠惶誠恐頓首頓首死罪

臣聞古者天子上法天心中極私情不違眾欲以順人理國為孝以克己制心為禮是故凡聖異禮公私殊制私心獨展凡人之孝萬姓感著聖人之孝也陛下行堯舜之事以

萬姓為心奈何守曾閔之節懷獨展之願臣等囂囂竊所未曉且永淳以後關輔流散近適旋定人猶未足今山陵起築役徒總萃彌春涉夏為費宏多若陛下此行群司畢從於人取給臣實難之水旱小愆農慮非淺東都則水漕淮海易資鹽穀之蕃陸走幽并近壓戎夷之便朝命新復人望在安宜應靜鎮未可移動陛下若俯順羣願留撫都人則其安若此如不勝私情攀奉靈駕則其慮如彼况扈從兵馬既不預集行宮廩蓄未先備發期甫邇支計闕然倉卒窮迫必不堪辦若待陵寢既安霜露終感三農歲稔萬乘時巡奉園廟以展虔瞻日月以何遠今固將行私



戀棄群言忘人力 國用此實非陛下安集新業之  
 圖亦恐非先后憐憫遺人之意且朝廷故事典章猶  
 在獻陵追遠太宗不至於三原昭陵上遷高宗不至  
 於九峻豈先帝私懷不甚孝故群臣公議之所奪也  
 伏願仰遵舊訓顧定新基屈至性而順群心抑小節  
 而成大孝使軍國長筭咸洛皆安邦甸窮人賦歛少  
 減萬姓翹望實深至願百寮結誠期於死請無任悲  
 迫之至謹詣朝堂奉表固請以聞

為留守奏慶山醴泉表

唐文有臣聞至德洞微天鑑不遠休徵祕景時和則  
見是知綿代曠歷慶謀唐文祥經帝王有必感之符



神靈無虛應之瑞伏惟天冊金輪聖神皇帝陛下金  
 鏡御天璿衡考政欽若元象宏濟蒼氓茂功將大造  
 混成純化與陽和俱扇朝百神之樂職宅萬國之歡  
 心嘉氣內充淫雨外息豈止搖風紀月之草列蒔於  
 階厨儀簫銜籙之禽相鳴於戶閣而已固有發禎厚  
 載抽眈泉源表元德之潛通顯黃祇之昭報臣於六  
 月二十唐文有唐文五字日得所部萬年縣令鄭固唐文忠狀  
稱云唐文六月十四日縣界霸陵鄉有慶山見醴泉  
 出謹臣差戶曹參軍孫履直對山中百姓檢閣得狀  
 其山平地湧拔周迴數里列置三峯齊高百仞山見  
 之日天晴唐文散無雲異風雲唐文雷雨唐文之遷徒非崖



峯唐文之騫震欬爾隆崇巍然翁鬱阡陌如舊草樹

不移驗唐文蓋地之祥圖知太一之靈化山南又有

醴泉三道引唐文注三池分流接潤連山對浦各

深丈餘廣數百步味色甘潔特異常泉比仙漿於軒

后均愈疾於漢代臣謹唐文按孫氏瑞應圖曰

慶山者德茂則生臣又按白虎通曰醴泉者美唐文

泉也可以養老嘗出京師禮斗威儀曰人君乘君而

王其政太平則醴泉湧潛潭巴曰君臣和德道度協

中則醴泉出臣竊以五行推之六月土王神在未母

之象也土為宮君之義也水為智土為信水伏於土

臣之道也水相於金子之佐也今土以月王而高水

從土制而靜天意若曰母王君尊良臣善相仁化致

理德茂時平之應也臣又以山為國鎮水實利人縣

有萬年之名山得三山之類此蓋金輿景福寶祚昌

圖邦固不移之基君永無疆之壽自永昌之後迄於

茲辰地寶屢昇神仙再聳未若連巖結慶並泌疏甘

群瑞同區二美齊舉高視古今曾無擬議信可以紀

元立號薦廟登郊彰賁德齡愉衍萬宇臣辱司京尹

忝寄留臺收唐文西夏之疲人荷東蕃之餘寵游涑

鴻沛唐文神禧嘉祉物感有歸唐文作震悚明神禧

歸唐文先啟茲部喜觀殊觀實百恒流踴躍一隅馳誠

雙闕伏請宣付史館頒示朝廷無任息藻之至唐文



謹遣某官  
繪圖奉進

為留守作奏瑞禾杏表

臣聞天微地杳惟聖能通物寶靈禧在德斯感伏惟  
天策金輪聖神皇帝陛下覆翼萬方植生群類化行  
至道風流太和白耀青光日日月之瑞赤文元甲手  
河洛之符既慶溢於山泉又嘉賁於草木臣今月三  
日得所部萬年縣令鄭固唐忠狀言縣界內霸陵  
鄉新出慶山南之醴泉北岸有瑞杏三樹再葉重花  
嘉禾三本同莖合穗臣謹差司兵參軍鄭味元檢覆  
皆實臣謹按孫柔之瑞應圖曰嘉禾者五穀之長也  
王者德茂則生昔炎帝教治人心而嘉禾秀周公理

山房校鈔書籍

合天道而嘉禾豐臣又以事可理推物有類驗蜀桑  
異葉李定知其有祥漢木奇枝終軍以為無外今植  
物搖落而瑞杏繁滋所謂仁育之風行於肅殺之序  
此蓋聖道隆渥靈祚和唐文作宏本多朱萼素花彰  
孝理於詩傳一莖九穎合德耀於祥經曠代殊珍崇  
朝累集方俟山流石髓杏茂仙林醴挹軒漿禾登堯  
膳受天介福錫帝長齡覲王母於崑臺朝神人於谷  
口今綠苗尚葆黃粒未成當須晚秋不獲早獻臣忝  
尹茲郡頻矚洪休抃躍之誠倍萬常品

為留守作賀岷山表

臣聞山川變見如來有得道之祥國土遠移至人任



不思之力伏惟皇帝陛下宏惠福深勤人願滿蓮花  
 授記應上聖之降生貝葉開圖握大雄之寶命司戶  
 參軍孫履直伏承臣奏所部萬年縣新出慶山醴泉  
 乃有天竺真僧於春首獻狀若以梵音所記此是祇  
 闍山恒河沙佛必經林下虛空衆聖堂唐文常處巖間  
 隱見外方湧秀中土岑泉可識體類宛然感應十號  
 之尊示見千輪之主此實天威無礙地寶有歸化焜  
 耀於裁成理窈冥於言說但瞻山三丹壁奄唐文靈  
 鷲而飛來三泉淥池逐神龍而吐沃峯高八百協周  
 室之隆基地得萬年祁唐文皇靈之資始儒書分載  
 望偈希聞加以堅固開林吉祥被草重花瑞杏藻岫

紅源九頰嘉禾窗蠻黛壑原臨白鹿識鹿苑之仙遊  
 路通朱城悟王城之鍾聽方俟迴輿雪嶺馱香積於  
 羣臣沈璧天池蔭靈枝於下國吹法螺而朝玉帛乘  
 瑞象而會天人溢宇流觀殊隣決慶臣守符京郡奉  
 神嶽於郊畿係葉皇柯仰慈雲於雨露喜并之極倍  
 百恒誠

羊乳麀唐文作為留守奏

唐文有臣聞靈感無方每先時以見象神鑑不昧必  
 憑物以示人有德著而休歸或祥來而事應伏惟天  
 冊金輪聖神皇帝陛下端冕馭天舞干柔遠南越瑞  
 貢久通澤而歸仁西域奇山近隨方而應聖臣今日



得所部萬年縣令鄭固唐文忠狀送新出慶山下殺  
 牝羊乳麀麀一頭狎擾因依動息隨戀如從所產若  
 素同群理有可嘉事無前例竊以異類相育外方慕  
 化之徵野畜自馴荒服來王之兆必有遠夷解辦歡  
 心百獸之庭擴俗懷音稽顙三乘唐文之會臣言可  
 驗翹足是期昔馬或生羊易占得人安之體夫時養  
 疑天鏡顯代康之文援此比蹤實為同貫况復晨飲  
 醴浦夕下靈山翳仙杏之奇花拾嘉禾之餘穗羊積  
 甚玉麀慶如銀晦朔未移祥符累集福應之盛前古  
 未聞臣忝尹京都屢薦嘉瑞抃躍之至兼倍恒流謹  
 差某官奉表隨進

為留守奏嘉禾表

臣某言臣聞天聽自人神和在德代非乏瑞罕遇交

唐文秦之期福不虛徵必俟休明之主伏惟天冊金

輪聖神皇帝陛下仁覆萬靈孝理四海功罔唐文高

於尊祖道莫大於配天嚴備郊禋崇肅宗祀秩百王

之禮兼六代之樂化唐文溢膠庠訓優更老政每光

於帝籍役不奪唐文於農時嘉氣橫浮唐文祥風紛

灑騰文煒色九光連合於貞明逸輦唐文殊輪唐文

百寶駟滋於動植臣今日日奉進止告望鳳臺慶山

醴泉之瑞其日於東山東山唐文柏城內得嘉禾一

本臣初見眾苗亘隴香穎垂秋嘉既繁滋欲觀稔粒



左右無識折以呈臣異其綠葉綬舒窗芒壁秀熟視  
 奇狀乃知嘉祥下則異畝合莖上又同連雙穗昔雍  
 熙之代理政之君雖導出應時而生不擇地未有託  
 根神域彰孝德之能深吐秀壽宮助染盛之豐潔此  
 蓋睿誠通感天唐文靈祐降祥中古以來未覩斯美臣  
 籍慶宗枝夕沐星潢之潤躬持瑞穎預奉天保之符  
 抃悅之誠倍兼恒品

為清邊道大總管建安王奏失利表

臣某唐文臣宜某乙言今日某往唐文峽石山稱前軍  
 王孝傑等以某日失利於峽石山忽聞殞絕心摧魄  
 死上孤天威下慙士卒死罪死罪頓首頓首臣以駕

怯謬職戎麾銜戴恩榮統率將士驅關隴之馬引淮  
 海之餉旗幕亘於邊城弓甲傾於內府不堪任使撓  
 失節度群帥無決勝之功偏師有挫衄之咎長羊犬  
 之孔熾縱梟鏡唐文之未滅憤結靈祇怨毒骨髓臣  
 實其罪罪非他人忍恥苟全遠愧胡顏之責引慝遄  
 死內負猶鬪之心踧踏無顏進退靡處臣既不建師  
 律有干常憲合即嚴科以塞重責然以見在兵馬交  
 要部統未敢束手軍事委置旌節稽緩刑書伏深兢  
 戰特乞更召嚴猛代臣統帥請歸罪司寇以正國刑  
 囚伏邊陲唯待斧鉞

為建安王謝賜衣及藥表



臣某言伏奉唐文下月日恩賜臣衣及藥渥流璿極

彩溢旌門拜捧戴舞載欣載越臣受律虧方扞城無

寄偏師不振逋寇仍滋進慙計日之尅退任唐文積踰

時之咎誠合歸罪司寇以厭深責豈圖天寵猥臨宸

慈寬假當從褫服轉承且吉之衣宜肆典刑翻加有

喜之藥毀車夷馬復振鸞和窮炭枯莖重敷榮觸唐文

作影雖邊塞心馳闕城作影雖邊塞心馳闕城唐文微

命易投生成難謝無任感戴之至

為建安王讓羽林衛大將軍兼檢校司賓

卿表

臣某言伏承月日勅書除臣右羽林衛大將軍兼檢

校司賓卿朝榮對及恩露洪垂罄仰驚拊環揆慙失

臣某頓首頓首臣席慶皇枝辱司天衛素官成責久

盈人口頃屬山戎自擅王師震如謬當推轂之禮竟

空汗馬之勳實賴眷誠唐文幽贊靈兵潛討犬

羊於遼海卷旌麾於燕薊臣得歸功北闕待罪東蕃

沫沫休既生死榮奉唐文安敢賣要塞而告勞貪天

功以為已又况羽林清禁上則星辰主客命卿下法

河海蓋文武具美方議望僉歸豈臣弊劣所堪尸忝

伏乞特迴矚鑒更擇能賢俾朝興薪蔭唐文之歌臣

免伐檀之刺非敢飾讓實披誠請無任悚戴之至謹

詣朝堂奉表陳讓以聞



為薛稷讓官表

臣稷言伏奉制書除臣工部尚書寵靈俯逮營魄震  
 飛揣分何階戴恩無力臣其中謝臣才乏濟川功微  
 橫草故以業承薪構澤潤葭莩劾雕蟲之薄技蒙金  
 螭之榮飾徒參進對愧無好詞頃以冗職東垣暫諧  
 清曠今若統司南省將招素飡五翟之正典事斯重  
 六官之長求人未易以臣叨授實謂唐文非宜願寢  
 前恩致命他士無任悚懼之至謹詣朝堂奉表陳讓  
 以聞臣所讓人別狀封進

為郭振讓官表

臣某言臣本書生幸事先帝歷踐清職遂參機密宗

武樹黨忿疾正人猜忌眉睫構結瘡痛臣與一二貞

士指天誓心支唐文梧群邪捍城王室曉入宮省暮

不望歸艱危備嘗幾不免禍日覲一日以逢開泰臣

之宿圖今已足矣陛下寶位既復元良又定凶讎咸

剪百度惟新正宜博采唐文屠鈞大變風俗豈臣微

才空忝重任外不厭於眾望內實畏於多言臣父年

老先嬰風疾五月以來不離枕席臣方寸已亂短効

無施夙夜在公扶持有關乞免官秩歸侍私庭罄心

仰恩期於孝治無任懇迫之至

為僧普潤辭公封表

僧普潤言伏奉甲寅制書以普潤加榮沐秩授邑封



公聖恩無涯將變枯朽佛法有教誠願住持普潤自  
 剃落壞衣五十餘載心不見是口不言俗因誠證業  
 憑禪悟理幸逢皇祚持糖啟大運有歸皇太子逼  
 畏凶讎永懷興復憂虞之際始蒙顧問貧道起廣救  
 之悲決必成之策奉符命之旨贊無畏之心今得眾  
 生又安群魔消伏在於法侶所願為多視身本無何  
 功受祿天位有得陛下享天之討有罪太子行之豈  
 貪天之功以為己力賣佛之法而求身利必若冒榮  
 背律返俗違真亦恐乖陛下崇信之誠失如來付囑  
唐文之義凡所稱述諸佛證明伏惟聖慈亦垂聞唐文  
唐文領乞停恩授以幸法門無任護戒傳道之至願謹

詣朝堂奉疏陳情以聞

張說之文集卷第二十四



詩之十四

山房校鈔書籍



卷一